

四庫全書

史部

欽定四庫全書

舊五代史卷二十

宋門下侍郎參知政事監修國史薛居正等撰

梁書第二十

列傳十

謝朏字子明福州人唐咸通末舉進士因留長安三歲  
不中第廣明初黃巢陷長安遂投跡于太祖泊居門下  
未嘗一日不在左右及太祖據同州遂署右職其年秋

太祖與河中交戰再不利連上章請兵于巢僞右軍都尉孟楷抑而不進瞳揣太祖有澤福意乃進說曰黃家以數十萬之師值唐朝久安人不習戰因利乘便遂下兩京然始竊僞號任用已失其所今將軍勇冠三軍力戰于外而孟楷專務壅蔽奏章不達下爲庸才所制無獨斷之明破亡之兆必矣況土德未厭外兵四集漕運波注日以收復爲名惟將軍察之太祖曰我意素決爾又如是復何疑哉翼日遂定策戮僞監軍使悉衆歸順

于河中王重榮表瞳爲檢校屯田員外郎賜緋令奉表  
于蜀唐僖宗大悅召入顧問錫賚甚厚以功授朝散大  
夫太子率更令賜紫爲陵州刺史治郡一歲改檢校右  
散騎常侍通刺史在任四考頗有政績秋罷詣蜀行在  
太祖遣人迎之龍紀二年至東京勞賚彌厚賜第墅各  
一區錢千緡表爲亳州團練使兼太清宮副使加檢校  
工部尚書是年冬太祖征淮南過郡因求侍府幕表爲  
宣義軍節度副使充兩使留後瞳在滑十三年部內增

戶約五萬益兵數千人累遷至大中大夫檢校右僕射卒于滑開平初追贈司徒

司馬鄴字表仁其先河內溫人也祖德璋仕唐爲杞王傅父諲左武衛大將軍鄴資蔭出身頗知書累官至大列唐天復初韓建用爲同州節度留後昭宗之幸鳳翔也太祖引兵入關前鋒至左馮翊鄴持印鑰迎謁道左太祖以兵圍華州命入城招諭韓建建果出降及大軍在岐下遣奏事于昭宗再入復出又使于金州說其帥

馮行襲倂堅攀附後厯宣武天平等軍從事開平元年  
拜右武衛上將軍三年使于兩浙時淮路不通乘驛者  
迂迴萬里陸行則出荆襄潭桂入嶺自番禺泛海至閩  
中達于杭越復命則備舟楫出東海至于登萊而揚州  
諸步多賊船過者不敢循岸必高帆遠引海中謂之入  
陽以故多損敗鄴在海逾年漂至耽羅國一行俱溺後  
詔贈司徒

劉捍開封人父行仙宣武軍大將捍少爲牙職太祖初

鎮夷門以捍聰敏擢副典客唐中和四年夏太祖以朱  
珍爲淄州刺史令收兵于淄青間命捍監其兵路逢大  
敵皆破之入博昌獲精兵三萬以歸四月合大軍敗蔡  
賊秦宗賢數萬衆于汴西文德元年十一月蔡將申叢  
折宗權足納款于太祖使捍奏其事加兼御史大夫光  
化三年六月太祖北伐鎮定至常山而王鎔危懼送款  
于太祖命捍入壁門傳諭時兩軍未整守門者戈戟干  
匝捍馳騎而入竟達其命又移師以攻中山至懷德驛

大破定人五萬衆王處直乞降捍復單馬入州安撫而  
迴太祖迎昭宗于岐下以捍爲親軍指揮天復三年正  
旦宋文通令客將郭啓奇使于太祖命捍復命昭宗聞  
其至卽召見詢東兵之事仍以錦服銀鞍勒馬賜之翼  
日授光祿大夫檢校司空登州刺史昭宗還京改常州  
刺史賜號迎鑾毅勇功臣四月太祖伐王師範于青州  
改左右長直都指揮使天祐三年正月授宋州刺史四  
月加檢校司徒太祖授禪授左龍虎統軍兼元從親軍



馬步都虞候及上黨纏兵太祖親往巡撫以捍爲御營使大軍次昂車斥候來告蕃戎逼澤州命捍以兵千人赴之并軍遂遁車駕還京授捍侍衛親軍都指揮使晉人侵晉州從幸陝迴加檢校太保及從駕幸河中詔追王重師赴行在以捍爲雍州節度觀察畱後纔踰月劉知俊據同州反潛使人以厚利啗捍將校遂爲部下所執送于知俊知俊繫捍歸于鳳翔爲李茂貞所害開平四年贈太傅末帝卽位又贈太尉捍便習賓贊善于將

迎自司賓局及征討四出必預其間雖無決戰爭鋒之績而承命奔走數揚命令勤幹涖職以至崇顯焉

王敬蕘潁州汝陰人世爲郡武吏唐乾符初敬蕘爲本州都知兵馬使中和初寇難益熾郡守庸怯不能自固敬蕘遂代之監郡俄真拜刺史加檢校右散騎常侍時

州境荒饑大寇繼至黃巢數十萬衆寨于州南敬蕘極力抗禦逾旬而退俄又宗權之衆凌暴益甚合圍攻壁皆力屈而去蔡賊復遣將刁君務以萬衆來逼敬蕘列

陣當之身先馳突殺敵甚多由是竟全郡壘遠近歸附及淮人不恭太祖屢以軍南渡路由州境敬菟悉心供億太祖甚嘉之乾寧二年署爲泇淮上下都指揮使四年冬龐師古敗于清口敗軍逃歸者甚衆路出于潁時雨雪連旬軍士凍餒敬菟自淮燎薪相屬于道郡中設糜糗餅餌以待之全活者甚衆由是表知武寧軍節度徐宿觀察畱後數月真拜武寧軍節度使天復二年入爲右龍武統軍天祐三年轉左衛上將軍開平元年八

月以疾致仕尋卒于其第敬菟魁傑沈勇多力善戰所用槍矢皆以純鐵鍛就槍重三十餘斤摧鋒突陣率以此勝雖非太祖舊臣而遠輸懇款保境合兵以輔興王之運有足稱者

高劭字子將淮南節度使駢之從子也父泰黔中觀察使唐僖宗避敵在蜀駢鎮淮南爲都統兼諸道鹽鐵使兵賦在已朝廷優假之以故劭幸而早官年十四逢領華州刺史光啓中以駢命逼晉公王鐸于鄭俄而州陷

于蔡劬爲賊所得使人守之戒四門曰無出高大夫劬  
伺守者稍惰佯爲乞食者過危垣取殍者衣全身易服  
得佗兒抱之行出東郊門人以爲丐者不之止及稍遠  
棄所抱兒疾趨至中年遂達于汴太祖以客禮遇之尋  
表爲亳州團練副使知州事又數年辟爲宣武軍節度  
判官在幕下頗以氣直自許後監鄭州事復權知徐州  
留後唐昭宗之鳳翔太祖迎奉未出劬有疑謀遂令赴  
華州詣丞相府以議其事行至高陵爲盜所害

馬嗣勲濠州鍾離縣人世爲軍吏嗣勲有口辯習武藝  
初爲州客將唐景福元年三月太祖以壽州刺史江儒  
反下蔡鎮使李立率兵攻濠梁刺史張遂俾嗣勲持州  
印籍戶口以歸于太祖乾寧二年三月楊行密復攻濠  
州張遂遣嗣勲求援于太祖俄而郡陷嗣勲無所歸卽  
署爲元從押牙副典客頗稱任使光化元年三月太祖  
令往光州說刺史劉存背淮賊以向國又從李彥威復  
黃州及武昌縣獲刺史瞿章俄復使光州持幣馬以賜

劉存會淮賊急攻光州存與嗣勲率兵大戰敗而走之  
又遣使于蜀及歸得其助軍貲實甚多天復中太祖迎  
昭宗于岐下軍至華之西閨使嗣勲入見韓建卽時同  
出迎謁及羅紹威將殺牙軍遣使告于太祖求爲外援  
時安陽公主初卒于魏太祖乃遣嗣勲率長直官千人  
實兵伏于橐中肩舁以入于魏聲言來致祭會葬牙軍  
不之覺天祐三年正月十六日夜嗣勲與紹威親軍同  
攻牙軍至曙盡殪之嗣勲重傷旬日而卒開平中累贈

太保

張存敬譙郡人也性剛直有膽勇臨危無所畏憚唐中  
和中從太祖赴汴以其折節頗見親昵授爲右騎都將  
從討巢蔡凡歷百戰多于危感之間顯有奇畧由是頻  
立殊効光啓中李罕之會晉軍圍張宗奭于盟津太祖  
遣丁會葛從周存敬同往馳救存敬引騎軍先犯敵將  
諸軍翼之敵騎大敗乃解河橋之圍大順三年爲諸軍  
都虞侯佐霍存董大軍收宿州以功奏加檢校兵部尚



書太祖東征徐充存敬屢有俘斬之功凡受指顧皆與  
機會矢石所及必以身先太祖尤加優異以爲行營都  
指揮使檢校右僕射乾寧三年充武寧軍留後行潁州  
刺史光化二年夏四月幽滄侵凌魏郡復以存敬爲都  
指揮使三年大舉興葛從周連統諸軍攻浮陽樹數十  
柵圍劉守文累月時幽州劉仁恭舉兵來援存敬潛軍  
擊之于乾寧軍南老鴉堤是日燕人大敗斬首五萬級  
生擒馬慎交已下一百餘人獲馬萬蹄其年秋九月引

軍收鎮州存敬勒衆涉滹沱河師人鼓行而進逢鎮之  
遊兵數千因逐之直入鎮之壅門收鞍馬牛馳萬計翼  
日鎮人納質而旋尋爲宋州刺史踰年甚有能政復擁  
衆伐薊門數旬間連下瀛莫祁景四州擒俘不可勝紀  
自懷德驛與中山兵接戰枕屍數十里中山開壁請降  
天復元年春太祖以河中節度使王珂與太原結親憑  
恃驕恣命存敬統大軍討之即日收絳州擒刺史陶建  
釗降晉州刺史張漢瑜二郡平進圍河中王珂請降太

祖嘉之乃以存敬爲護國軍留後未幾檢校司空尋移  
宋州刺史將之任所寢疾踰旬卒于河中太祖聞之痛  
惜移晷開平初追贈太保乾化三年又追贈太傅子仁  
愿晉天福中仕至大理

寇彥卿字俊臣大梁人也祖瑄父僞皆宣武軍牙校太  
祖鎮汴以彥卿將家子擢在左右弱冠選爲通贊官太  
祖爲元帥補元帥府押牙充四鎮通贊官行首兼右長  
直都指揮使累奏授檢校司徒領洺州刺史羅紹威將

殺牙軍遣使告于太祖太祖命彥卿使于魏密與紹威謀之竟成其事彥卿之力也彥卿身長八尺隆準方面語音如鐘善騎射好書史復善伺太祖之旨凡所作爲動皆云合太祖每言曰敬翔劉捍寇彥卿蓋爲我而生其見重如此太祖有所乘烏馬號一丈烏嘗以賜彥卿天復中太祖迎昭宗于鳳翔累與岐軍對陣時彥卿爲諸道馬步軍都排陣使嘗躬擐甲胄乘其所賜烏馬馳騁于陣前太祖目之曰真神王也昭宗還京賜迎鑾毅

勇功臣改邢州刺史尋遷亳州團練使

案通鑑開平二年帝從吳越王

錢鏐之請以亳州團練使冠彥卿爲東南面行營都指揮使使擊淮南十一月彥卿帥衆一千襲霍丘爲土豪

朱景所敗又攻廬壽二州皆不勝淮南遣滁州刺史李儼拒之九國志朱景傳梁祖聞景名命冠彥卿率勁騎

三千襲霍丘圍取景且諭梁祖之意令降景率其徒太戰于丘墟林澤中射死者無數彥卿兵折力殫而去太

祖受禪爲華州節度使加檢校太保歲餘入爲左金吾

衛大將軍充街使一日過天津橋有老人悞衝其騶道

者排之落橋而斃爲御史所彈太祖不得已責授左衛

中郎將不數月除相州防禦使依前行營諸軍排陣使

未幾授河陽節度使加檢校太傅及太祖遇弒彥卿追  
感舊恩圖御容以奠之每因對客言及先朝舊事卽涕  
泗交流末帝嗣位遙領興元節度使東南面行營都招  
討使以拒淮寇尋改右金吾衛上將軍貞明初授鄧州  
節度使會淮人圍安陸彥卿奉詔領兵解圍大破淮賊  
而迴四年卒于鎮時年五十七詔贈侍中彥卿貞幹明  
敏善事人主然怙寵作威多忌好殺雖顯立功名而猶  
爲識者之所鄙焉

史臣曰

案原本有闕文

存敬有提鼓之勞彥卿遇攀鱗之會俱

爲藩后亦其宜哉

舊五代史卷二十

舊五代史卷二十攷證

梁列傳十司馬鄴傳而揚州諸步多賊船 諸步原本作諸走攷容齋隨筆云步者水傍之名今改正

劉捍傳光化三年六月太祖北伐鎮定又移師以攻中山 案梁祖下鎮定服中山舊唐書作光化三年九月新唐書作十月是書總繫于六月據通鑑自六月舉兵九月始定中山也

張遂傳刺史張遂 案新唐書作張璲



太祖令往光州說刺史劉存背淮賊以向國 案新唐書本紀乾寧三年楊行密陷光州刺史劉存死之九國志柴再用傳乾寧中從朱延壽平劉存于弋陽授知光州軍事梁兵寇光州再用擊走之事俱與是書異

又從李彥威復黃州獲刺史瞿章 案全忠陷黃州新唐書作乾寧四年九國志作三是書繫光化元年年與諸史異

張存敬擒刺史陶建釗 案建釗原本作建鈺今據通

鑑改正

舊五代史卷二十攷證

欽定四庫全書

舊五代史卷二十一

宋門下侍郎參知政事監修國史薛居正等撰

梁書第二十一

列傳十一

龐師古曹州南華人初名從以中涓從太祖性端愿未嘗離左右及太祖鎮汴樹置戎伍始得馬五百匹即以師古為偏將援陳破蔡累有戰功及朱珍以罪誅遂用

師古為偏將揮使乃渡淮餉軍于廬壽攻滁州破天長  
下高郵汧淮轉戰所至克捷尋代朱友裕領軍攻下徐  
州斬時溥首以獻遂移軍伐兗州入中都寨于梁山敗  
朱瑄之衆襲至壘下又破朱瑾于清河從討汶陽與朱瑄  
朱瑾及晉將史儼兒戰于故樂亭大捷而迴乾寧四年正  
月復統諸軍伐鄆拔之擒其帥朱瑄以獻始表為天平軍  
節度留後尋授徐州節度使官至檢校司徒乾寧四年八  
月與葛從周分統大軍渡淮以伐楊行密十一月師古寨

于清口寨地界下

玉堂閒話云龐從會軍五萬于清口所心之地蓋兵書謂之絕地人不駕肩行

一舍方至夷坦之處

或請遷移弗聽俄有告淮人決上流者曰水至

矣師古怒其惑衆斬之

九國志侯瓚傳時兵起倉卒加以陰寒士皆飲氷餐雪而行甫及梁

營則豎戈植足鬪志未決朱瑾與瓚率五十騎潛濟淮入自壘北舞槩而馳驚聲雷沸梁兵皆殞眩不能舉遂斬龐從大將繼之

死者大半

須臾我軍在淖中莫能戰而吳人襲焉故及

于敗師古没于陣

霍存洺州曲周縣人性驍勇善騎射在黃巢中已為將領唐中和四年太祖大破巢軍于王滿渡時存與葛從周張

歸霸皆自巢軍來降太祖宥而納之其後破王夏寨擊殷  
鐵林並在戰中尋佐朱珍取滑臺攻淄川取博昌皆預戰  
立功時蔡賊張旺在汴北存以三千人夕犯其營破之用  
本部騎兵敗秦賢軍殺五千人連破四寨盡得其輜重從  
討盧塘張旺殪萬餘人存功居多我軍之圍濮州也有賊  
升眺樓大詬太祖怒甚召存射之矢一發而屍隕其下賞  
賚甚厚復佐朱珍擒石璠破魏師敗徐戎又佐龐師古至  
呂梁敗時溥二千餘衆以是累遷官初王師渡淮乏食不

甚利惟存軍戰有功淮賊乃引退太祖之討宿州也葛從

周以水壞其垣丁會以師乘其墉存戰壘外敗其軍宿人

乃降明年佐郴王友裕擊時溥于碭山破之獲蕃將石君

和等五十人

歐陽史云存代李唐賓攻時溥溥敗碭山存獲其將石君和等五十人梁攻宿州葛從周

引水浸之丁會與存戰城下遂下之

是歲復與晉軍戰于馬牢川始入為前

鋒出則後拒晉不敢逼乃渡河襲淇門殺三千餘人曹州

刺史郭紹賓之來歸也存以師援之遂代其任始朱友裕

以大軍伐鄆臨其壁既而師陷圍中以急來告存領二百



騎馳赴急退之太祖喜拔為諸軍都指揮使景福二年春太祖親至曹州留騎軍數千令存將之且曰有急則倍道兼行以赴之俄聞朱瑾領兵二萬入援彭門存乃領騎軍馳赴之與徐兗之衆合戰于石佛山下大敗之存亦中流矢而卒時人稱其忠勇初朱珍李唐賓之歿龐師古代珍存代唐賓戰伐功績多與師古同始遙領韶州牧又改賀州後用為權知曹州刺史官至檢校右僕射及太祖登極屢有征討因有猛士之歎一日幸講武臺閱

兵謂諸將曰霍存在朕安有此勞苦耶諸君其思之他日語又如如是累贈官至太保子彥威後唐明宗朝為青州節度使

符道昭淮西人性強敏有武畧秦宗權用為心膂使監督諸軍後為騎將尤能布陣勇聞于時然剛而無操善迎人意一見若盡肺腑必甚愛其才而道昭之心腹颺矣秦宗權之將敗也有薛潛者支擘隊伍道昭謂所私曰蔡弱矣乃歸潛潛欲敗復奔洋州依葛從佐攻興元

軍不利復奔于岐宋文通愛之養為己子名繼遠遂易其宗及得軍職悉超儕伍後為巴州刺史又奏為隴州防禦使兼中軍都指揮使太祖迎奉昭宗駐軍于岐下道昭頻領騎士敢鬪戰屢為王師所敗遂來降太祖素聞其名待之甚厚昭宗反正奏授秦州節度使同平事遣兵援送不克而還先是李周彝棄鄜州自投歸國署為元帥府行軍左司馬寵冠霸府及道昭至以為右司馬使與周彝同領冠彥卿南大豐閭寶已下大軍伐

滄州及太祖幸魏州討牙軍中軍前有魏博將山河營  
指揮使左行遷聞府中有變引軍還屯歷亭自稱留後  
從亂者數萬人道昭佐周彝與彥卿已下大破之殺四  
萬餘人擒左行遷斬之有史仁遇亦聚徒數萬據高唐  
又破之擒仁遇以獻乘勝取澶博二州平之復殺萬餘  
人道昭性勇果多率先犯陣屢有摧失而周彝彥卿倚  
角繼進連以告捷護兵者上功不實皆以道昭為首太  
祖陰知之俱不議賞及滄州之圍也不用騎士令道昭

牧馬于唐陽太祖受禪後委兵柄與康懷英等攻潞州以蚰蜒塹繚之飛鳥不度既踰歲晉人援至王師大敗道昭為晉軍所殺

徐懷玉本名琮亳州雋夷縣人少以雄傑自任隨太祖起軍唐中和末從至大梁光啟初蔡寇屯金堤驛懷玉將輕騎連破之由是累遷親從副將改左長劍都虞候又從破蔡賊于板橋收秦宗權入寨奏加檢校右散騎常侍文德初同諸軍解河陽之圍復從破徐宿乾寧中

奏加檢校刑部尚書太祖賜名懷玉破朱瑾于金鄉南擒宗江以獻表授金紫光祿大夫檢校右僕射乾寧四年龐師古失利于清口懷玉獨完軍以退光化初轉滑州右都押牙兼右步軍指揮使俄奏授沂州刺史頃之王師範以青州叛屢出兵侵軼懷玉擊退之天復四年轉齊州防禦使加檢校司空從大軍迎駕于岐下歸署華州觀察留後一年復領所部兵戍雍州尋名赴河中補晉絳同華五州馬步都指揮使天祐三年授左羽林

統軍轉右龍虎統軍領六軍之士赴澤州尋為晉軍所  
攻晝夜衝擊穴地而入懷玉率親兵逆殺于隧中晉軍  
遂退開平元年授曹州刺史加檢校司徒明年除晉州  
刺史其秋晉軍大至已乘其墉懷玉選親兵五十餘人  
擁殺下城晉軍既退出家財以賞戰士歲中晉軍又至  
懷玉領兵敗之于洪洞三年制授鄜坊節度使特進檢  
校太保練兵繕壁人頗安之加檢校太傅乾化二年庶  
人友珪既篡立河中朱友謙拒命遣兵襲鄜州懷玉無

備尋為河中所擄囚于公館及友珪遣康懷英率師圍河中友謙慮懷玉有變遂害之懷玉材氣剛勇臨陣未嘗折退平生金瘡被體有戰將之名焉

郭言太原人也家于南陽新野少以力穡養親鄉里稱之唐廣明中黃巢擁衆西犯秦雍言為巢黨所執後從太祖赴汴初為騎軍繼有戰功後擢為裨校言性剛直有權畧勤于戎事或以家財分給將士之貧者由是頗得士心屢將兵與蔡冠戰于浚郊每以少擊衆出必勝



歸太祖嘉其勇果謂賓佐曰言乃吾之虎侯也時宗權  
支黨數十萬太祖兵不過數十旅每恨其寡與之不敵  
一日命言董數千人越河洛趨陝虢招召丁壯以實部  
伍言夏往冬旋得銳士萬餘遂遷步軍都將自是隨太  
祖掩襲蔡寇斬獲掠奪不可勝紀宗權以茲敗北太祖  
盡收其地因命言將兵導達貢奉以安郵傳自汴鄭迄  
于潼關去奸恤弱甚得其所光啓中唐天子以太祖兵  
威日振命兼揚州節度使太祖遣幕吏李璠領兵赴維

揚以制置為名時言為李璠前鋒深入淮甸破盱眙而  
還梁祖東伐徐鄆言將偏師略地千里頻逢寇敵言出  
奇決戰所向皆捷大挫東人之銳太祖錄其績以排陣  
斬斫之號委之尋表為宿州刺史檢校右僕射于時徐  
宿兵鋒日夕相接控扼偵邏以言為首景福初時溥大  
舉來攻宿州言勇士野戰喜逢大敵自引銳兵擊溥殺  
傷甚眾徐戎乃退言為流矢所中一夕而卒

李唐賓陝州陝縣人也中和四年二月尚讓之寇繁臺

也唐賓與李讜霍存並為巢將與太祖之軍戰于尉氏門外三月太祖破瓦子寨唐賓與王虔裕來降時黃巢壁于東郊乃命唐賓摩其西圍焚焉王滿之師王夏之陣唐賓悉在戰中後與朱珍趣淄州所向摧敵及取滑平蔡前後破鄆淮徐之衆功與朱珍略等而驍勇絕倫善用矛未嘗不率先陷陣其善于治軍行師之道亦與珍齊名珍之擒石璠也唐賓亦泐淮與郭言犄角下盱眙其後渡河破黎陽李固等鎮攻澶州下內黃敗魏州

未嘗不與珍同暨攻蔡之役珍自西南破其外垣唐賓亦堙壕坎墉推其東北隅及伐徐取豐時溥軍于吳康珍亟遇之未能却唐賓引本軍擊敗之珍遂大勝每興師必與珍偕用故往無不利然而剛中用壯遂為珍所害以謀叛聞太祖聞之痛惜累日及誅朱珍後令其妻孥至軍收葬而加弔祭焉

王虔裕瑯琊臨沂人也家于楚丘少有膽勇多力善射以弋獵為事唐乾符中諸葛英聚徒于青棣間攻剽郡

縣虔裕依其衆及與歸順乃以虔裕及其衆隸于宣武軍太祖鎮汴四郊多事始議選將征討首以虔裕綰騎兵恒為前鋒及太祖擊巢蔡于陳州虔裕連拔數寨擒獲萬計巢孽既遁虔裕躡其迹追至萬勝戍賊衆饑乏短兵纔接而潰太祖以其勞表授義州刺史蔡人日縱侵掠陳鄭許毫之郊頻年大戰虔裕掩襲攻拒凡百餘陣勦戮生擒不知紀極秦宗賢寇汴南鄆太祖令虔裕逆擊于尉氏不利而還太祖怒命削職拘于別部踰年

邢州孟遷請降未幾晉人伐邢孟遷遣使來乞師太祖  
先遣虔裕選勇士百餘人徑往赴之伺夜突入邢州明  
日循堞樹立旗幟晉人不測乃退數月復來圍邢時太  
祖大軍方討兗鄆未及救援邢人困而携貳遷乃繫虔  
裕送于太原尋為所害

劉康乂壽州安豐縣人也以農桑為業唐乾符中關東  
羣盜並起江淮間偏罹其苦因為巢黨所掠康乂沈默  
有膂力善用矛槊然不樂為暴中和三年從太祖赴鎮

委以腹心康又枕戈擐甲夷險無憚其後累典親軍襲  
巢破蔡斬獲尤多累以戰功遷元從都將從太祖連年  
攻討徐兗鄆所向多捷尤善于營壘充諸軍壕寨使及  
太祖盡下三鎮議其功奏加檢校右僕射兼領軍衛尋  
遷密州刺史政甚簡靜時王師範叛據青州乞師于淮  
夷淮人遂攻密州密兵素少執銳者不滿千夫而淮賊  
踰萬康又率老弱守陴自別領少壯日與接戰于密之  
四郊俘擒千計賊知密州虛弱援兵未至晝夜急攻遂

陶康又為賊所害

王彥章字賢明鄆州壽張縣人也祖秀父慶宗俱不仕以彥章貴秀贈左散騎常侍慶宗贈右武衛將軍彥章少從軍隸太祖帳下以驍勇聞稍遷軍職累典禁兵從太祖征討所至有功常持鐵槍衝堅陷陣開平二年十月自開封府押牙左親從指揮使授左龍驤軍使三年轉左監門衛上將軍依前左龍驤軍使乾化元年改行營左先鋒馬軍使加金紫光祿大夫檢校司空依前左監



門衛上將軍二年庶人友珪篡位加檢校司徒三年正月授濮州刺史本州馬步軍都指揮使依前先鋒馬軍使未幾改先鋒步軍都指揮使四年為澶州刺史進封開國伯五年三月朝廷議割魏州為兩鎮慮魏人不從遣彥章率精騎五百屯鄴城駐于金波亭以備非常是月二十九日夜魏軍作亂首攻彥章于館舍彥章南奔七月晉人攻陷澶州彥章舉家陷沒

通鑑云晉人夜襲澶州陷之刺史王

彥章在劉鄩營晉人獲其妻子

晉王遷其家于晉陽待之甚厚遣細人

間行誘之彥章即斬其使以絕之後數年其家被害九月授汝州防禦使檢校太保依前行營先鋒步軍都指揮使貞明二年四月改鄭州防禦使三年十二月授西面行營馬軍都指揮使加檢校太傅依前鄭州防禦使頃之授行營諸軍左廂馬軍都指揮使五年五月遷許州兩使留後軍職如故六年正月正授許州匡國軍節度使充散指揮都頭都軍使進封開國侯未幾授北面行營副招討使七年正月移領滑州三年四月晦晉師

陷鄆州中外大恐五月以彥章代戴思遠為北面招討使拜命之日促裝以赴滑臺遂自楊村砦浮河而下水陸俱進斷晉人得勝之浮梁攻南城拔之晉人遂棄北城併軍保楊劉彥章以舟師沿流而下晉人盡徹北城拆屋木編棧置步軍其上上與彥章各行一岸每遇轉灘水匯即中流交關流矢雨集或舟棧覆沒比及楊劉凡百餘戰彥章急攻楊劉晝夜不息晉人極力固守垂陷者數四六月晉王親援其城彥章之重重壕複壘晉

人不能入晉王乃于博州東岸築壘以應鄆州應章聞之馳軍而至急攻其柵自旦至午其城將拔會晉王以大軍來援彥章乃退七月晉王至楊劉彥章軍不利遂罷彥章兵權詔令歸闕以段凝為招討使先是趙張二族撓亂朝政彥章深惡之性復剛直不能緘忍及授招討之命因謂所親曰待我立功之後回軍之日當盡誅奸臣以謝天下趙張聞之私相謂曰我輩寧死于沙陲之手不當為彥章所殺因協力以傾之時段凝以賄賂

交結自求兵柄素與彥章不協潛害其功陰行逗撓遂至王師不利竟退彥章而用段凝未及十旬國以之亡矣是歲秋九月朝廷聞晉人將自兗州路出師末帝急遣彥章領保鑾騎士數千于東路守捉且以鄆州為敵人所據因圖進取令張漢傑為監軍一日彥章渡汶以略鄆境至遞坊鎮為晉人所襲彥章退保中都十月四日晉王以大軍至彥章以衆拒戰兵敗為晉將夏魯奇所擒魯奇嘗事太祖與彥章素善及彥章敗識其語音

曰此王鐵槍也揮稍刺之彥章重傷馬踣遂就擒晉王  
見彥章謂之曰爾常以孺子待我今日服未又問我素  
聞爾善將何不保守兗州此邑素無城壘何以自固彥  
章對曰大事已去非臣智力所及晉王惻然親賜藥以  
封其創晉王素聞其勇悍欲全活之令中使慰撫以誘  
其意彥章曰此是匹夫本朝擢居方面與皇帝十五年  
抗衡今日兵敗力窮死有常分皇帝縱垂矜宥何面目  
見人豈有為臣為將朝事梁而暮事晉乎得死幸矣晉

王又謂李嗣源曰爾宜親往諭之庶可全活時彥章以重傷不能興嗣源至卧內以見之謂嗣源曰汝非邈佖烈乎邈佖烈蓋嗣源小字也彥章素輕嗣源故以小字呼之既而晉王命肩輿隨軍至任城彥章以所傷痛楚堅乞遲留遂遇害時年六十一彥章性忠勇有膂力臨陣對敵奮不顧身嘗謂人曰李亞子關鷄小兒何足畏初晉王聞彥章授招討使自魏州急赴河上以備衝突至則德勝南城已為所拔晉王嘗曰此人可畏當避其

鋒一日晉王領兵迫潘張寨大軍隔河未能赴援彥章  
援槍登船叱舟人解纜招討使賀瓌止之不可晉王聞  
彥章至抽軍而退其驍勇如此及晉高祖遷都夷門嘉  
彥章之忠欵詔贈太師搜訪子孫錄用五代史補王彥章之應募也同  
時有數百人而彥章營求為長衆皆怒曰彥章何人一  
旦自草野中出便欲居我輩之上是不自量之甚也彥  
章聞之乃對諸將指數百人曰我天與壯氣自度汝等  
不及故求作長耳汝等咄咄得非勝負將分之際耶且  
大凡健兒開口便言死死則未暇且共汝輩赤腳入棘  
針地走三五遭汝等能乎衆初以為戲既而彥章果然  
衆皆失色無敢效之者太祖  
聞之以為神人遽擢用之



賀德倫其先河西部落人也父懷慶隸滑州軍為小校德倫少為滑之牙將太祖領四鎮德倫以本軍從繼立軍功累歷刺史留後遷平盧軍節度使乃魏博楊師厚卒朝廷以德倫代其任貞明元年三月二十九日夜魏軍作亂執德倫囚于別館盡殺其部衆為亂首張彥所迫遣使歸款于太原晉王自黃澤嶺東下至臨清德倫遣從事司空頤密啟晉王訴以張彥凌辱之事晉王至永濟斬彥等八人然後入于魏德倫即以符印上晉王

通鑑晉王既入德倫上印節請王兼領天雄軍王固辭  
曰比聞汴寇侵逼貴道故親董師徒遠來相救又聞城  
中新罹塗炭故暫入存撫明公不垂鑒信乃以印節見  
推誠非素懷德倫再拜曰今寇敵密邇軍城新有大變  
人心未安德倫心腹紀綱為張彥所殺殆盡形孤  
勢弱安能統軍一旦生事恐負大恩王乃受之 尋授

雲州節度使行次河東監軍張承業留之不遣頃之王  
檀以急攻襲太原德倫部下多奔逸承業懼其為變遂  
誅德倫并其部曲盡殺之

舊五代史卷二十一

舊五代史卷二十一攷證

梁列傳十一龐師古傳始表為天平軍節度留後尋授  
徐州節度使 案師古先為留後繼授節度通鑑止  
作留後誤

霍存傳用本部騎兵敗秦賢軍 秦賢王虔裕傳作秦  
宗賢

有賊升眺樓大詔 眺樓原本作昭樓今据歐陽史改  
符道昭傳符道昭淮西人 案歐陽史作蔡州人

徐懷玉傳授左羽林統軍 案歐陽史作右羽林統軍  
郭言傳破盱眙而還 案通鑑作言力戰得免梁祖紀  
亦作不克而還與此傳異

李唐賓傳時溥軍于吳康 吳康原本訛吳唐今據歐  
陽史改正

王虔裕傳時太祖大軍方討兗鄆未及救援 案通鑑  
攷異云是時全忠方攻時溥未討兗鄆也傳誤

劉康乂傳尋遷密州刺史 密州原本訛宣州今據新

唐書昭宗紀改正

王彥章傳彥章字賢明鄆州壽張縣人也 賢明歐陽

史作子明壽張歐陽史作壽昌

領保鑾騎士數千于東路守捉 案歐陽史從家傳作

五百人又作畫像記極辨舊史領數千人以往之非

攷通監云梁主命王彥章將保鑾士及他兵合萬人

屯兗鄆之境又通鑑李嗣源敗彥章于遞坊鎮獲將

士三百人斬首二百級使彥章所將止于五百恐師

徒盡喪不應尚能再戰也彥章忠于所事力竭而亡  
非戰之罪歐陽史必欲減其兵數轉非實錄

舊五代史卷二十一攷證

欽定四庫全書

舊五代史卷二十二

宋門下侍郎參知政事監修國史薛居正等撰

梁書第二十二

列傳十二

楊師厚潁州斤溝人也為李罕之步將以猛決聞尤善  
騎射及罕之敗退保澤州師厚與李鐸何綱等來降太  
祖署為忠武軍牙將繼歷軍職累遷檢校右僕射表授



曹州刺史唐天復三年從太祖迎昭宗于岐下李茂貞以勁兵出戰為師厚所敗及王師範以青州叛太祖遣師厚率兵東討時淮賊王景仁以衆二萬來援師範師厚逆擊破之追至輔唐縣斬數百級授齊州刺史將之任太祖急召見于鄆西境遣師厚率步騎屯于臨朐而聲言欲東援密州畱輜重于臨朐師範果出兵來擊師厚設伏于野追擊至聖王山殺萬餘衆擒都將八十人未幾萊州刺史王師誨以兵救師範又大敗之自是師

範不復敢戰師厚移軍至于城下師範力屈竟降天復四年三月加檢校司徒徐州節度使天祐元年加諸軍行營馬步都指揮使二年八月太祖討趙匡凝于襄陽命師厚統前軍以進趙匡凝嚴兵以備師厚至穀城西童山刊材造浮橋引軍過漢水一戰趙匡凝敗散攜妻

子泂漢遁去翼日表師厚為山南東道節度畱後

舊唐書天

祐三年六月甲申敕襄州近因趙匡凝作帥請別立忠義軍額既非往制固是從權忠義軍額宜停廢依舊為山南東道節度使  
即令南討荊州畱後趙匡明亦棄軍上峽不

浹旬併下兩鎮乃正授襄州節度使先是漢南無羅城  
師厚始興板築周十餘里郭郭完壯開平元年加檢校  
太保同平章事明年又加檢校太傅三年三月入朝詔  
兼潞州行營都招討使無何劉知俊據同州叛師厚與  
劉鄩率軍西討至潼關擒知俊弟知浣以獻知俊聞師  
厚至即西走鳳翔師厚進攻至長安時知俊已引岐寇  
據其城師厚以奇兵傍南山急行自西門而入賊將王  
建驚愕不知所為遽出降制加師厚檢校太尉頃之晉

王與周德威丁會符存審等以大衆攻晉州甚急太祖遣師厚帥兵援之軍至絳州晉軍扼蒙院之險師厚整衆而前晉人乃撤圍而遁四年二月移授陝州節度使五年正月王景仁敗于栢鄉晉人乘勝圍邢州掠魏博南至黎陽師厚受詔以兵屯衛州晉軍攻魏州不克而退師厚追襲過漳河解邢州之圍改授滑州節度使明年太祖北征令師厚以大軍棗強逾旬不能克太祖屢加督責師厚晝夜奮擊乃破之盡屠其城車駕還師

厚屯魏州及庶人友珪篡位魏州衙內都指揮使潘晏與大將臧延範趙訓謀變有密告者師厚布兵擒捕斬

之歐陽史云師厚乘間殺魏牙將潘晏臧延範等逐出節度使羅周翰越二日又有指揮

使趙賓夜率步軍擐甲俟旦為亂師厚以衙兵圍捕賓不能起乃越城而遁師厚遣騎追至肥鄉擒其黨百餘人歸斬于府門友珪即以師厚為魏博節度使檢校侍中未幾鎮人晉人侵魏之北鄙師厚率軍至唐店破之斬首五千級擒都將三千餘人是時師厚握河朔兵威

望震主友珪患之詔師厚赴闕師厚乃率精兵萬人至洛陽嚴兵于都外自以十餘人入謁友珪懼厚禮而遣之及末帝將圖友珪遣使謀于師厚深陳款効且馳書于侍衛軍使袁象先及主軍大將又遣都指揮使朱漢賓率兵至滑州以應禁旅友珪既誅末帝即位于東京首封師厚為鄴王加檢校太師中書令每下詔不名以官呼之事無巨細必先謀于師厚師厚頗亦驕誕先是鎮人以我栢鄉不利之後屢擾邊境師厚總大軍直抵

鎮州城下焚盪閭舍移軍掠藁城東鹿至深州而歸乾  
化五年三月卒于鎮廢朝三日贈太師師厚純謹敏幹  
深為太祖知遇委以重兵劇鎮他莫能及然而末年矜  
功恃衆驟萌不軌之意于是專割財賦置銀槍効軍節  
凡數千皆選摘驍銳縱恣募養復故時牙軍之態時人  
病之

清異錄云槍材難得十全魏州石屋材多  
可用楊師厚時銀槍効節都皆采于此

承前河

朔之俗上元比屋夜遊及師厚作鎮乃課魏人戶立  
燈竿千鈺萬炬洞照一城縱士女嬉遊復彩畫舟舫令

女妓擢歌于御河縱酒彌日又于黎陽採巨石將紀德政以鐵車負載驅牛數百以拽之所至之處丘墓廬舍悉皆毀壞百姓望之皆曰碑來及碑石纔至而師厚卒魏人以為悲來之應末帝聞其卒也于私庭受賀乃議裂魏州為兩鎮既而所樹親軍果為叛亂以招外寇致使河朔淪陷宗社覆滅由師厚兆之也

牛存節字贊貞青州博昌人也本名禮太祖改而字之少以雄勇自負唐乾符末鄉人諸葛爽為河陽節度使



存節往從之。爽卒存節謂同輩曰：「天下洶洶當擇英主，事之以圖富貴，遂歸于太祖。初授宣義軍小將，屬蔡冠至金堤驛，犯酸棗、靈昌，存節日與之鬪。凡二十餘往，每往必執俘而還，前後斬首二十餘級，獲孳畜甚衆。太祖擊蔡賊于板橋，赤垌、酸棗門封禪寺、枯河北，存節皆預其行，與諸將于濮州南。劉橋、范縣大破鄆衆，自此深為太祖獎遇。文德元年夏，李罕之以并軍圍張宗奭于河陽。太祖遣存節率軍赴之，屬歲歉，饑餽不至，村民有儲

乾堪者存節以器用錢帛易之以給軍食大破賊于洹  
河罕之引衆北走又預討徐宿有功及討河北存節前  
鋒下黎陽收臨河至內黃西以兵千餘人當魏人萬二  
千衆大破其陣殪仆蔽野太祖深所歎激謂有神兵之  
助大順元年改滑州左右廂牢城使與諸將討時溥累  
破賊軍景福元年秋改過後都指揮使攻濮之役領軍  
先登遂拔其壘二年四月下徐州梟時溥存節力戰其  
功居多乾寧二年授檢校工部尚書三年夏太祖東討

鄆州存節領軍次故樂亭扼其要路都指揮使龐師古  
屯馬頰存節密與都將王言謀入鄆壘十二月存節遣  
王言夜伏勇士于州西北以船踰濠舉梯登陴既而王  
言不克入存節獨率伏軍負梯輦破其西甕城奪其濠  
橋諸軍俱進四年四月陷其城尋與葛從周降下兗州  
加檢校右僕射其年秋大舉以伐淮南至濠州東聞前  
軍失利于清口諸軍退至淝河無復隊伍存節遏其後  
諸將釋騎步鬪諸軍稍得濟收合所部並敗兵共八千

餘人至于淮涘時不食已四日矣存節訓勵部分以禦  
追寇遂得旋師五年除亳州刺史俄遷宣武軍都指揮  
使改宿州刺史明年淮賊大至彭城存節乃以步下兵  
夜發直趣彭門淮人訝其神速震恐而退諸將服其智  
識光化二年罷歸復為左衙都將兼馬步教練使天復  
元年授潞州馬步都指揮使法令嚴整士庶安之及追  
赴行在士卒泣送者不絕于道加金紫光祿大夫檢校  
司空改滑州左衙步軍指揮使知邢州軍州事天祐元

年授邢州團練使時州纔及二百人晉人知之以大軍來寇太祖在鄴發長直兵二千人赴援存節率壯健出鬪以家財賞激戰士并軍急攻七日不能克而去太祖召至勞慰久之厚資金帛鞍馬加檢校司徒冬罷軍署為元帥府左都押衙四年太祖受禪除右千牛衛上將軍其秋攻潞州以存節為行營馬步軍都排陣使開平二年二月自右監門衛上將軍轉右龍虎統軍駐畱洛下是歲王師敗于上黨晉人乘勝進迫澤州州城將

陷河南畱守張全義召存節謀遂以本軍及右龍武羽  
林等軍往應接上黨師至天井關存節謂諸將曰是行  
也雖不奉詔旨然要害之地不可致失時晉人新勝其  
鋒甚盛存節引衆而前銜枚夜至澤州守遇守埤者已  
縱火鼓噪以應外軍刺史保衙城不知所為存節纔入  
晉軍已至矣乃分布守禦晉軍四面攻鬪開地道以入  
城存節亦以隧道應之逆戰于地中晉軍不能進又以  
勁弩射之中者人馬皆洞經十三日晉軍死傷者甚衆

焚營而退郡以獲金太祖屢歎賞之五月遷左龍虎統  
軍充六軍馬步都指揮使十月授絳州刺史三年四月  
除鄜州留後六月劉知俊以同州叛尋授同州留後未  
幾加檢校太保同州節度使乾化二年加檢校太傅進  
封開國公存節戒嚴軍旅常若敵至先是州中井水鹹  
苦人不可飲及井人岐人來迫州城或以為兵士渴乏  
陷在旦夕存節乃肅拜虔祝擇地鑿八十餘井其味皆  
甘淡由是人馬汲濯有餘衆以為至誠之感自八月至

三年春末人馬未嘗釋甲以至寇退尋加同平章事詔赴闕末帝召慰勉賞賜甚厚十一月加開府儀同三司食邑一千戶授鄆州節度使四年加淮南西北面行營招討使控扼淮瀆邊境安之其冬蔣殷據徐州逆命存節方以大衆戍潁州得殷逆謀密以上聞遽奉詔與劉鄩同討之頓于埇上淮賊朱瑾以兵救殷距宿之兩舍聞存節兵大至即委糧棄甲而遁竟平徐州詔加大尉夏中病渴且瘠屬河北用軍末帝令率軍屯陽畱以張



劉鄩之勢存節忠憤彌篤未嘗言病料敵治戎旦夕愈厲病革詔歸汶陽翼日而卒將終戒其子知業知讓等以忠孝言不及他冊贈太師存節武鷙慷慨有大節野戰壁守皆其所長威名聞于境外深為末帝所重而木強忠厚有賈復之風焉

王檀字衆美京兆人也曾祖泚唐左金吾衛將軍隴州防禦使祖曜定難功臣渭橋鎮遏使父環鴻臚卿以檀貴累贈左僕射檀少英悟美形儀好讀兵書洞曉韜略

唐中和中太祖鎮大梁檀為小將四年汴將楊彥洪破  
巢將尚讓李讜于尉氏門外檀在戰中摧鋒陷陣遂為  
太祖所知稍蒙擢用預破蔡賊于斤溝淝河八角遷踏  
白都副將光啓二年從胡真擊淮西之衆解河陽之圍  
蔡賊張存敢乘亂據洛陽檀與勇士數十人潛入賊柵  
邀其輜重存敢遁走胡真至陝州開通貢路遣檀攻玉  
山寨降賊帥石令殷從擊秦宗賢于鄭州西北河灘之  
上于太祖馬前射賊將孫安應弦而斃三年佐都指揮

使朱珍敗徐戎于孫師陂獲其將孫用和束詡以獻從  
擊蔡賊于板橋偏將李重裔追賊馬蹟為蔡人所擒檀  
奪取而旋獲賊將薛注太祖破朱瑾于劉橋檀盡收其  
軍實文德元年三月討羅弘信敗魏人于內黃檀獲其  
將周儒邵神劔以歸補衝山都虞候是歲與諸軍平蔡  
州明年佐朱珍大破時溥之衆檀獲賊將何肱改左踏  
白馬軍副將預征兗鄆累立戰功大順元年從龐師古  
渡淮深入討孫儒之亂奪邵伯堰破高陞軍檀奮命擊

賊刃傷左臂未幾遷順義都將天復中從太祖率四鎮之師圍鳳翔以迎昭宗屢立戎効遷左踏白指揮使從

攻王師範于青丘檀以偏師收復密郡

永陽志云張訓守密州刺史朱

全忠至青州訓謂諸將曰汴人將至何以禦之諸將請焚城大掠而歸訓曰不可乃封府庫植旗幟于城上遣羸弱居前自以精兵殿其後而去全忠遣王檀攻密州數日乃敢入城 遂權知軍州事充

本州馬步軍都指揮使尋表授檢校右僕射守密州刺

史郡接淮戎舊無壁壘乃率夫修築羅城六旬而畢居

民賴之加檢校司空開平二年六月授邢州保義軍節

度使檢校司徒三年加檢校太保充潞州東北面行營  
招討使乾化元年正月王景仁與晉人戰于栢鄉王師  
敗績河朔大震景仁與衆為敵騎所追擅嚴設備應接  
敗軍助以資裝獲濟者甚衆俄而晉軍大至重圍四合  
土山地穴晝夜攻擊太祖憂之擅密上表請駕不親征  
而悉力枝梧竟全城壘三月以功就加檢校太傅同平  
章事七月又加開府儀同三司檢校太尉進封瑯琊郡  
王命宣徽使趙殷衡賫詔慰諭賜絹千疋銀千兩賞守

禦邢州之功也庶人友珪僭位授鄧州宣化軍節度使  
檢校太尉兼侍中末帝即位移授許州匡國軍節度使  
加檢校太師五年蔡州刺史王彥溫作亂檀受詔討平  
之加兼中書令貞明元年三月魏博軍亂六月晉王入  
魏州分兵收下屬郡河北大擾檀受詔與開封尹劉鄩  
犄角進師以援河北檀攻澶州魏縣下之擒賊將李巖  
王開關以獻頃之檀密疏請以奇兵西趣河中自陰地  
關襲取晉陽末帝許之即馳兵而去二年二月師至晉

陽晝夜急攻其壘并州幾陷既而蕃將石家才自潞州以援兵至檀引軍大掠而還尋授天平軍副大使知節度使事充鄆齊曹等州觀察等使先是檀招誘羣盜選其勁悍者寘于帳下以為爪牙至是數輩竊發突入府第檀素不為備遂為所害時年五十一節度副使裴彥聞變率府兵盡擒諸賊州城帖然尋冊贈太師謚曰忠毅葬于開封縣之臯門原有子六人皆升朝列

史臣曰夫大都偶國春秋所非當師厚之據鄴城也綰

數萬之甲兵擅六州之輿賦名既震主勢亦滔天逮其  
喪亡湏議分割由茲以失河朔因是以啓晉人詩所謂  
誰生厲階者師厚之謂歟存節王檀俱出身事主底力  
圖功觀其方畧皆將帥之良者也



舊五代史卷二十二

舊五代史卷二十二攷證

列傳十二梁揚師厚傳晉軍扼蒙阮之險 阮原本作  
坑考通鑑注云蒙阮在汾水之東東西三百餘里蹊  
徑不通即此處也今改正

晉人乃徹圍而遁 案通鑑攷異引梁實錄云生擒賊  
將蕭萬通等賊由是棄寨而遁莊宗實錄云汴軍至  
蒙阮周德威逆戰敗之二軍各言勝捷其互異如此  
通鑑從是書

牛存節傳牛存節字贊貞 贊貞原本作替貞夏文莊

集引是書又作潛真今據歐陽史改正

大破賊于洹河 洹河原本訛沢河今據歐陽史及通

鑑改正

存節訓勵部分以禦追寇遂得旋師 案舊唐書作牛

存節一軍以先渡獲免與是書所云追寇旋師異

末帝令率軍屯陽畱 案陽畱即楊劉見通鑑攷異又

攷李重進碑作楊留新唐書作楊劉蓋地名通用

王檀傳補衝山都虞候

衝山原本訛衡山今據歐陽

史改正

舊五代史卷二十二攷證

欽定四庫全書

舊五代史卷二十三

宋門下侍郎參知政事監修國史薛居正等撰

梁書二十三

列傳十三

劉鄩密州安丘縣人也祖綬密州戶掾累贈左散騎常侍父融安丘令累贈工部尚書鄩幼有大志好兵略涉獵史傳唐中和中事青州節度使王敬武為小校敬武

卒三軍推其子師範為留後朝廷命崔安潛鎮青州州人拒命棣州刺史張蟾將襲師範師範遣都指揮使盧弘攻棣州弘反與蟾通偽旋軍以襲師範師範知之設伏兵以迎弘既而享之先誡鄆曰弘至即斬之鄆如約斬弘於座上同亂者皆誅之師範以鄆為馬步軍副都指揮使攻下棣州殺張蟾朝廷因授師範平盧軍節度使光化初師範表鄆為登州刺史歲餘移刺淄州署行軍司馬天復元年昭宗幸鳳翔大祖率四鎮之師奉迎

於岐下李茂貞與內官韓全誨矯詔徵天下兵入援師  
範覽詔慷慨泣下遣腹心乘虛襲取太祖管内州郡所  
在同日竊發其事多泄唯鄆以偏師陷兗州遂據其郡  
初鄆遣細人詐為鬻油者覘兗城內虛實及出入之所  
視羅城下一水竇可以引衆而入遂誌之鄆乃告師範  
請步兵五百宵自水竇銜枚而入一夕而定軍城晏然  
市民無擾

金華子云鄆入據子城甲兵精銳城內人皆束手莫敢抗拒加以州將悍虐人情不附鄆

因而撫治民皆安堵

太祖命大將葛從周攻之時從周為節度使



領兵在外州城為鄆所據家屬悉在城中鄆善撫其家  
移就外第供給有禮升堂拜從周之母及從周攻城鄆  
以板輿請母登城母告從周曰劉將軍待我甚至不異  
於兒新婦已下並不失所劉將軍與爾各為其主爾其  
察之從周歔歔而退鄆料簡城中老疾及婦人浮食百  
不足與守者悉出之於外與之將士同甘苦分衣食以  
抗外軍戢兵禁暴居人泰然從周攻圍既久鄆無外援  
人情稍有去就之意一日節度副使王彥溫踰城而奔

守陴者從之而逸鄆之守兵禁之不可鄆即遣人從容告彥溫曰請副使少將人出非素遣者請勿帶行又揚言於衆曰素遣從副使行者即勿禁其擅去者族之守民聞之皆感奔逸者乃止外軍聞之果疑彥溫有姦即戮之於城下自是軍城遂固及王師範兵力漸窘從周以禍福諭鄆陴之革面鄆報曰俟青州本使歸降即以城池還納天復三年十一月師範告降且言先差行軍司馬劉鄩領兵入兗州請釋其罪亦以告鄆鄆即出城

聽命太祖嘉其節槩以爲有李英公之風鄆既降從周具行裝服馬請鄆歸大梁鄆曰未受梁王捨釋之旨乘肥衣裘非敢聞命即素服跨驢而發及將謁見太祖令賜冠帶鄆曰累囚負罪請就繫而入太祖不許及見慰撫移時且飲之酒鄆以量小告太祖太祖曰取兗州量何大耶旋授元從都押牙太祖牙下諸將皆四鎮舊人鄆一旦以羈旅之臣驟居衆人之右及與諸將相見並用階庭之禮太祖尤奇重之未幾表爲鄆州留後是時

邠岐之衆屢寇其境鄆禦捍備至太祖以其地遠慮失  
鄆即令棄郡引軍屯於同州天祐二年二月授右金吾  
衛大將軍充街使三月正月太祖授元帥之任以鄆為  
元帥府都押牙執金吾如故開平元年授右金吾上將  
軍充諸軍馬步都指揮使其年秋與諸將征潞州遷檢  
校司徒三年二月轉右威衛上將軍依前諸軍馬步都  
虞侯五月改左龍武統軍充侍衛親軍馬步軍都指揮  
使其年夏同州劉知俊反引岐人襲據長安分兵扼河

潼太祖幸陝命鄆西討即奮取潼關擒知俊弟知浣以  
獻遂引兵收復長安知俊棄郡奔鳳翔太祖以鄆為佑  
國同州軍兩使留後尋改佑國軍為永平軍以鄆為節  
度使檢校司徒行大安尹金州管內觀察使是時西鄙  
未寧密邇寇境鄆練兵撫衆獨當一面四年加檢校太  
保同平章事庶人友珪篡位加檢校太傅乾化三年正  
月丁內艱友珪命起復視事未帝即位尤深倚重明年  
夏詔鄆歸闕授開封尹遙領鎮南軍節度使旋屬晉人

寇河朔鄆奉詔與魏博節度使楊師厚禦之而退九月  
徐州節度使蔣殷據城叛時朝廷以福王友璋鎮徐方  
殷不受代末帝遣鄆與鄆帥牛存節率兵攻之殷求援  
於淮夷僞吳楊溥遣大將朱瑾領衆赴援鄆逆擊破之  
貞元元年春城陷殷舉族自燔於火中得其尸梟首以  
獻詔加檢校太尉三月魏博楊師厚卒朝廷分相為魏  
兩鎮遣鄆率大軍屯南樂以討王鎔為名既而魏軍果  
亂囚節度使賀德倫送款於太原六月晉王入魏州鄆

以精兵萬人自洹水移軍魏縣晉王來覘鄆設伏於河曲叢木間俟晉王至大譟而進圍之數匝殺獲甚衆晉王僅以身免是月鄆潛師由黃澤西趨太原將行慮為晉軍所追乃結葛為人縛旗於上以驢負之循堞而行數日晉人方覺軍至樂平會霖雨積旬師不克進鄆即整衆而旋魏之臨清積粟之所鄆引軍將據之遇晉將周陽五自幽州率兵至鄆乃取貝州與晉軍遇於堂邑鄆邀擊卻之追北五十餘里遂軍於莘縣增城壘浚池

隍自莘及河築甬道以通餉路八月末帝賜鄆詔曰閩  
外之事全付將軍河朔諸州一旦淪沒勞師弊旅患難  
日滋退保河壩久無鬪志昨東面諸侯奏章來上皆言  
倉儲已竭飛輓不充於役之人每遭擒擄夙宵軫念惕  
懼盈懷將軍與國同休當思良畫如聞寇敵兵數不多  
宜設機權以時剪撲則予之負荷無累先人鄆奏曰臣  
受國深恩忝茲閫政敢不枕戈假寐罄節輸忠昨者比  
欲西取太原斷其歸路然後東收鎮冀解彼連鷄止於



旬時再清河朔豈期天方稔亂國難未平纔出師徒積  
旬霖潦資糧殫竭軍士札瘥切慮蒼黃垂於統攝乃詢  
部伍皆欲於歸凡次舍經行每張倚角又欲絕其餉道  
且據臨清纔及宗城周陽五奄至騎軍馳哭變化如神  
臣遂領大軍保於莘縣深溝高壘享士訓兵日夜戒嚴  
伺其進取偵視營壘兵數極多婁煩之人皆能騎射最  
為勦敵未可輕謀臣若苟得機宜焉敢坐滋患難臣心  
體國天鑒具明未帝又遣使問鄴決勝之策鄴曰臣無

奇謀但人給糧十斛盡則破敵末帝大怒讓鄆曰將軍蓄米將療饑耶將破賊耶乃遣中使督戰鄆集諸校而謀曰主上深居宮禁未曉兵機與白面兒共謀終敗人事大將出征君命有所不受臨機制變安可預謀今揣敵人未可輕動諸君更籌之時諸將皆欲戰鄆默然他日復召諸將列坐軍門人具河水一器因命飲之衆未測其旨或飲或辭鄆曰一器而難若是滔滔河流可勝既乎衆皆失色居數日鄆率萬餘人薄鎮定之營時鄆

軍奄至上下騰亂殺獲甚衆少頃晉軍繼至乃退二年三月鄆自葦引軍襲魏州與晉王戰於故元城王師敗績鄆脫身南奔自黎陽濟河至滑州尋授滑州節度使詔屯黎陽三年二月晉王悉衆來攻黎陽鄆拒之而退及鄆歸闕再授開封尹領鎮南軍節度使其年河朔失守朝廷歸咎於鄆鄆亦不自安上表避位九月落平章事授亳州團練使屬淮人寇蔡潁亳三郡鄆奉命渡淮至霍丘大殲賊黨五年兖州節度使張萬進反北結晉

人為授末帝遣鄆攻之鄆為兗州安撫制置使是冬萬進危蹙小將邢師遇潛應王師遂拔其城梟萬進首以獻十一月制授泰寧軍節度使檢校太尉同平章事六年六月授河東道招討使與華州尹皓攻取同州先是河中朱友謙襲取同州以其子令德為留後表請旄鉞末帝怒命鄆討之其年九月晉將李嗣昭率師來援戰於城下王師不利敗兵走河南橋梁陷溺死者甚衆鄆以餘衆退保華州羅文寨先是鄆與河中朱友謙為婚

家及王師西討行次陝州鄆遣使賫檄與友謙諭以禍福大計誘令歸國友謙不從如是停留月餘尹皓段凝輩素忌鄆遂構其罪言鄆逗留養寇俾俟援兵末帝以爲然及兵敗詔歸洛河南尹張宗奭承朝廷密旨逼令飲酖而卒時年六十四詔贈中書令子遂凝遂雍別有傳

賀瓌字光遠濮陽人也曾祖延以瓌貴贈左監門上將軍祖華贈左散騎常侍父仲元贈刑部尚書瓌少儻

負雄勇之志遇世亂入軍朱瑄為濮州刺史兼鄆州馬  
步軍都指揮使拔為小將唐光啟初鄆州三軍推瑄為  
留後以瑊為馬步軍都指揮使表授檢校工部尚書及  
瑄與大祖構隙瑊受瑄命數領軍於境上乾寧二年十  
月太祖親征兗鄆十一月瑄遣瑊與太原將何懷寶率  
兵萬餘人以援朱瑾師次待賓館斷我糧運太祖偵知  
之自中都引軍夜馳百餘里遲明至鉅野東與瑊等接  
戰兗人大敗瑊竄於棘塚之上大呼曰我是鄆州都將

賀瓌願就擒幸勿傷也太祖聞之馳騎至塚前遂擒之  
并獲何懷寶及將吏數十人徇於充壁之下悉命戮之  
唯留瓌一人釋縛寘之麾下尋署為教練使奏授檢校  
左僕射瓌感太祖全宥之恩私誓以身報國天復中預  
平青州王師範以攻授曹州刺史兼先鋒都指揮使加  
檢校司空天祐二年與楊師厚從太祖平荆襄授荆南  
兩使留後未幾徵還為行營左廂步軍都指揮使開平  
二年十月授左龍虎軍馬步都指揮使十二月改左衛

上將軍充六軍馬步都虞候三年五月轉右龍虎統軍  
未幾加檢校司徒邢州團練使四年二月改澤州刺史  
充昭義軍節度留後檢校太保進封開國侯乾化二年  
七月授相州刺史尋加檢校太傅有頃轉左龍虎統軍  
貞明二年慶州叛為李據陟所據瓌以本官充西面行  
營馬步軍都指揮使兼諸軍都虞候與張筠破涇鳳之  
衆三萬下寧衍二州三年秋慶州平十二月瓌以功授  
滑州宣義軍節度使依前檢校太傅加同平章事尋授



北面行營招討使四年春晉人取楊劉城據之八月瓌  
與許州節度使謝彥章領大軍營於濮州之行臺村對  
壘數月一日晉王以輕騎挑戰瓌與彥章發伏兵奮擊  
晉王僅以身免先是瓌與彥章不協是歲冬十二月復  
為諸軍都虞侯朱珪所構瓌乃伏甲士殺彥章及濮州  
刺史孟審澄別將侯溫裕等於軍以謀叛聞是月瓌與  
晉人大戰於胡柳陂晉人敗績臨陣斬晉將周陽五既  
晡瓌軍亦敗五年春正月晉人城德勝夾河為柵四月

瓌率大軍攻其南柵以艨艟戰艦阨其中流晉人斷我  
艨艟濟軍以援南柵瓌退軍於行臺尋以疾卒時年六  
十二詔贈侍中長子光圖仕後唐為供奉官

康懷英兗州人也本名懷貞避太祖御名故改之始以  
驍勇事朱瑾為列校唐乾寧四年春太祖既平鄆命葛  
從周乘勝急攻兗州時朱瑾在豐沛間搜索糧餉留懷  
英守其城及從周軍至懷英聞鄆失守乃出降太祖素  
聞其名得之甚喜尋署為軍校光化元年秋從氏叔琮

伐襄漢懷英以一軍攻下鄧州三年從征河朔佐張存  
敬敗燕軍於易水之上天復元年冬太祖率師迎昭宗  
於鳳翔時李茂貞遣大將符道昭領兵萬餘屯武功以  
拒太祖命諸軍擊之以懷英為前鋒領衆先登一鼓而  
大破之擄甲士六千餘人奪馬二千匹翼日太祖方至  
顧左右曰邑名武功今首盪逆黨真武功也乃召懷英  
大加獎激仍以駿馬珍器賜之二年四月符道昭復領  
大軍屯於號縣之漢谷其建寨之所前臨巨澗後倚峻

阜險不可升太祖遣懷英提騎數千急擊之道昭以懷英兵寡有俯視之意乃率甲士萬人絕澗以挑戰懷英始以千騎夜鬪戰酣發伏兵以擊之岐軍大敗秋八月鄜帥李周彝屯軍於三原以援鳳翔太祖命懷英討之周彝拔軍而遁追至梨園因攻下翟州擒其守來獻俄而岐軍屯奉天太祖令懷英寨於岐軍之東北以備敵人一夕岐軍大至急攻其營懷英以夜中不可驚動諸軍獨以二千餘人抗數萬之衆自乙夜至四鼓身被十

餘創岐軍不勝而退昭宗還京賜迎鑾毅勇功臣是歲  
淮人聞青兗之叛遣兵數萬以寇宿州太祖命懷英馳  
騎以救之淮人遁去即以懷英為權知宿州刺史天祐  
三年冬佐劉知俊破郃鳳之衆五萬於美原收五十餘  
寨乘勝引軍攻下鄜州以功授陝州節度使太祖受禪  
加檢校太保開平元年夏命將大軍以伐潞州將行太  
祖謂懷英曰卿位居上將勇冠三軍向來破敵摧鋒動  
無遺悔至於高爵重祿我亦無負於卿夫忠臣事君有

死無二韓信所謂漢王載我以車衣我以衣食我以食  
食人之祿死人之憂我每思韓信此言真忠烈丈夫耳  
如丁會受我待遇之恩不謂不至懷黃拖紫裂土分茅  
設令木石偶人須感恩義一朝反噬倒戈授人苟有天  
道明神安能容此大凡孤恩負理忠良不為我今掃境  
內委卿卿當勉思竭盡況晉人新得上黨衆心未叶和  
以十萬之師一舉可克予當置酒高會望卿歌舞凱旋  
懷英惶恐而退六月懷英領大軍至潞率衆晝夜攻城

半月之間機巧百變懷英懼太祖之言期於必取乃築壘環城濬鑿池塹然而屢為戰將周德威騎軍所撓懷英不敢即戰太祖乃以李思安代之降為行營都虞候夏五月晉王率蕃漢大軍攻下夾城懷英逃歸詣銀臺門待罪太祖宥之改授右衛上將軍三年夏命為侍衛諸軍都指揮使尋出為陝州節度使兼西路行營副招討使及劉知俊奔鳳翔引岐軍以圖靈武太祖遣懷英率兵救之師次長城嶺為知俊邀擊懷英敗歸

歐陽史云還至

昇平知俊掩擊之懷英大敗過鑑懷貞等運至三水知  
俊遣兵據險邀之左龍驤軍使壽張王彥章力戰懷貞  
等乃得過懷貞與裨將李德遇許從實王審權分道而  
行皆與援兵不相值至昇平劉知俊伏兵山口懷貞大  
敗僅以身免德遇等軍皆沒蓋懷英過長  
城嶺之險已為邀擊後又敗於昇平也

### 四年春移華

州節度使乾化二年秋命為河中行營都招討使與晉  
軍戰於白徑嶺敗歸於陝末帝嗣位以岐軍屢犯秦雍  
命懷英為永平軍節度使大安尹累加官至中書令貞  
明中卒於鎮

王景仁

景仁本名茂章避梁諱改馬詳見通鑑注

廬州合淝人材質魁偉性



暴率無威儀善用槩頗推驍悍在淮南累職為都指揮使楊行密偽署宣州節度使行密死子渥自立忌其勇悍且有私憾欲害之景仁棄宛陵以腹心百人歸吳越

王錢鏐

新唐書楊行密傳渥求茂章親兵不得宣輦惟帝以行茂章嫚罵不與踰年遣兵五千襲之茂

章奔杭州

鏐辟為兩府行軍司馬具以狀聞太祖復命遙領

宣州節度使檢校太傅同平章事鏐以淮寇終為巨患欲速平之命景仁奉表至闕面陳水陸之計請合禁旅太祖異禮待之頒賜殊厚顧曰待我平代北寇當盡以

王師付汝南討於是留京師每預丞相行列劉知俊之  
叛也從駕至陝始佐楊師厚西入關兵未交知俊棄馮  
翊走進尅雍華降王建張君練頗預戰有功太祖嘉之  
時鎮定作逆朋附蕃醜遂擢為上將付步騎十萬為北  
面行營都招討使開平二年正月二日與晉軍戰於栢  
鄉王師敗績太祖怒甚拘之私第然以兩浙元勲所薦  
且欲收其後効止落平章事罷兵柄而已

歐陽史景仁及晉人戰大

敗於栢鄉景仁歸訴於太祖太祖曰吾亦知之蓋歸効李思安輕汝為客而不從節度爾數月復其

官爵未帝即位復用為南面北面行營招討應接使以兵萬餘人伐壽州至霍丘接戰擒賊將袁藁王彥威王璫等送京師俄而朱瑾以大軍至景仁力戰不屈常以數騎身先奮擊寇不敢逼乃引兵還及濟淮復為殿軍

故不甚衄瑾亦不敢北渡

九國志朱景傳王茂章來寇度淮水可涉處立表識之景


易置於深潭水中立表浮木之上茂章軍敗望表而涉溺死者大半積其尸為京觀

及歸病疽而

卒詔贈太尉

史臣曰劉鄩以機略自負賀瓌以忠毅見稱懷英以驍

勇佐時景仁以貞純許國較其器業皆名將也然雖有  
善戰之勞亦有敗軍之咎則知兵無常勝豈虛言哉然  
鄆之據兗州也盡誠於師範比跡於英公方之數侯加  
一等矣



舊五代史卷二十三

舊五代史卷二十三攷證

梁列傳十三劉鄩傳朝廷命崔安潛鎮青州 安潛原

本訛守潛今據新唐書改正

太祖命大將葛從周攻之 大將葛從周金華子作充

帥張姓疑傳聞之誤

鄩即出城聽命 案劉鄩叛附於梁新唐書昭宗紀作

十月丁丑與是書作十一月異

以為有李英公之風 英公原本訛殷公攷新唐書李

勅封英國公今改正

殺獲甚衆晉王僅以身免 案通鑑作晉王帥騎馳突  
所向披靡自午至申乃得出亡其七騎與此云僅以  
身免異蓋當時梁唐二史各有夸張掩飾故所紀不  
同如此

逼令飲酖而卒 按通鑑攷異引莊宗實錄作憂恚發  
病卒

賀瓌傳張筠破涇鳳之衆三萬

張筠原本訛張節令

據通鑑攷異改正

別將侯溫裕等 侯溫裕玉堂閒話作侯溫疑傳聞之  
異



舊五代史卷二十三 攷證

欽定四庫全書

史部

舊五代史卷二十七  
四至

詳校官編修<sub>臣</sub>黃壽齡

洗馬<sub>臣</sub>王坦修覆勘

總校官編修<sub>臣</sub>朱 鈐

校對官助教<sub>臣</sub>李 巖

騰錄監生<sub>臣</sub>謝 雲

欽定四庫全書

唐五代史卷二十四

永門軍侍郎參知政事監修國史薛居正等撰

梁書第二十四

列傳十四

李琰字公度隴西燉煌人五世祖忠懿公愷有大節見  
唐史父穀仕懿僖朝官至右諫議大夫琰聰悟有才學  
尤工詞賦僖宗朝晉公王鐸提兵柄鎮滑臺穀居賓席

鐸見珽大賞歎之年二十四登進士第解褐授校書郎  
拜監察御史俄丁內艱先是父旅殯在遠家貧無以裹  
事與弟琪當臘雪以單線扶杖街哀告人由是兩克遷  
祔而珽日不過食一溢恒羸卧喪廬中不能興大為時  
賢所歎憂閔再徵為御史以瘠不起成汭之鎮荊州辟  
為掌書記踰時乃就天復中淮寇大舉圍夏口逼巴陵  
太祖患之飛命成汭率水軍十萬援於鄂珽入言曰今  
舳艫容介士千人載稻倍之緩急不可動吳人剽輕若

為所絆則武陵武安皆我之讎也將有後慮不如遣驍將屯巴陵大軍對岸一月不與戰則吳寇糧絕而鄂州圍解矣汭性剛決不聽淮人果乘風縱火舟盡焚兵盡溺汭亦自沈于江朗人潭人遂入荆渚一如所料未幾襄帥趙匡凝復奏為掌記入為左補闕又明年太祖為元帥以襄陽貳于已率兵擊破之趙匡凝奔揚州太祖復署珽為天平軍掌書記一日大會將佐指珽曰此真書記也滄州節度使劉守文拒命太祖引軍十餘萬圍

之久而未下乃召珽草檄珽即就外次筆不停綴登時而成大為太祖嗟賞受禪之歲宰臣除為考功員外郎知制誥珽揣太祖未欲首以舊僚超拜清顯三上章固辭優詔褒允尋以本官監曹州事曹去京數舍吏民豪猾前後十餘政未有善罷者珽在任期歲衆庶以寧入為兵部郎中崇政院學士未幾以許帥馮行襲疾甚出為許州留後先是行襲有牙兵二千皆蔡人也太祖深為憂乃遣珽馳往以伺察之珽至傳舍召將吏親加撫

慰行襲欲使人代受詔珽曰東首加朝服禮也乃于卧  
内宣詔令善自補養苟有不諱子孫俱保後福行襲泣  
謝遂解二印以授珽代掌軍府事太祖覽奏曰予固知  
珽必辦吾事行襲門戶不朽矣乃以珽為匡國軍留後  
尋徵為左諫議大夫兼宣徽副使從征至魏縣過内黃  
因侍立于行殿太祖顧曰此何故名内黃珽曰河南有  
外黃小黃故此有内黃又曰外黃小黃在何處對曰秦  
有外黃都尉理外黃有故墉今在雍邱小黃為高齊所

廢其故壩今在陳留太祖稱獎數四及庶人友珪篡位除右散騎常侍充侍講學士內討之日軍士大擾珽為亂兵所傷其夕卒于洛陽珽心孝友與弟珙有敦睦之

愛為搢紳所稱

案歐陽史有裴迪韋震傳原文已佚無可采補

盧曾字孝伯其先范陽人也頗好書有所執守始為齊州防禦使朱瓊從事瓊降預其謀與之皆來瓊沒太祖辟為宣義幕職魯性忠狷好貢直又不能取容于衆每勲府讌語稍洽魯率然紆正輒又忤旨左長直軍使劉捍



委任方重曾亦不能平冀王友謙初定陝府命曾往議  
事有使院小將從行嗜酒荒逸過度曾復命欲發其罪  
致疏于袖中累日未果言小將恐事洩先誣告曾使酒  
幾敗軍事劉捍因證之由是罷職歸于齊之別墅俄而  
王師範起兵叛太祖促召曾謂之曰子能緩頰說青州  
使無背盟吾不負子矣曾持檄以往既至青師範囚之  
送于淮南遇害後太祖暴師範之罪曰喪我骨肉殺我  
賓僚遂族誅之召曾二子皆授以官

孫隲滑臺人嗜學知書微有辭筆唐光啟中魏博從事  
公乘億以女妻之因教以牋奏程式時中原多難文章  
之士縮影竄跡不自顯億既死魏帥以章表牋疏淹積  
兼月不能發一字或以隲言之即署本職主奏記事累  
遷職自支使掌記至節度判官奏官自校書御史郎官  
中丞檢校常侍至兵部尚書太祖御天下念潛龍時隲  
奉其主好問徃來數十返甚錄之開平三年除右諫議  
大夫滿歲遷左散騎常侍隲雅好聚書有六經漢史洎

百家之言凡數千卷皆簡翰精至披勘詳定得暇即朝夕耽翫曾無少怠乾化二年春太祖將議北巡選朝士三十餘人扈從二月甲子車駕發自洛陽禹中次白馬頓召文武官就食以從臣未集駐驛以俟之又命飛騎促于道而隲與諫議大夫張衍兵部郎中張儁等累劾方至太祖性本卞急因茲大怒並格殺于前墀

張儁字彥臣祖父咸有聞于時儁少孤自修飾善為五言詩其警句頗為人所稱唐廣明中黃巢犯京師天子

幸蜀士皆竄伏窟穴以保其生僞亦晦跡浮泛不失其道及僖宗還京師由校書郎西畿尉登朝為御史補闕起居郎司勳員外萬年縣令以事黜官峽中將十年太祖即位用宰臣薛貽矩為鹽鐵使僞與貽矩同年登第甚知其才即奏為鹽鐵判官遷職為禮部郎中兼職如故乾化二年二月扈從後至與孫隲張衍同日遇禍于白馬頓

張衍字玄用河南尹魏王宗爽之猶子也其父死于兵

間衍樂讀書為儒始以經學就舉不中選時諫議大夫  
鄭徽退居洛陽以女妻之遂命應辭秋不數上登第唐  
昭宗東遷以宗奭勲力隆峻衍由校書郎拜左拾遺旋  
召為翰林學士太祖即位罷之特拜考功郎中俄遷右  
諫議大夫衍巧生業樂積聚太祖將北伐頗以扈從間  
靡耗力用繫意屢干託宰執求免是行太祖微聞之又  
屬應召稽晚與孫薦等同日遇禍

杜荀鶴池州人

辛文房唐才子傳荀鶴  
字彥之牧之微子也

善為詩辭句切

理為時所許既擢第復還舊山

唐才子傳荀鶴嘗謁梁王朱全忠與之坐忽無

雲而兩王以為天泣不祥命作詩稱意王喜之荀鶴寒

進連敗文場甚苦至是送春官大順二年裴贄侍郎放

第八人登科正月十日放榜正荀鶴生朝也王希羽獻

詩曰金榜曉懸生世日玉書潛記工昇時九華山色高

千尺未必高于第八枝又唐新纂云荀鶴舉進士及第

東歸過夷門獻梁太祖詩句云四海九州空第一不同

東鎮府封王是則荀鶴之受知于梁祖

舊矣不待田願之薦問而始被遇也

時田願在宣州

甚重之願將起兵乃陰令以箋問至太祖遇之頗厚及

願遇禍太祖以其才表之尋授翰林學士主客員外郎

既而恃太祖之勢凡搢紳間已所不悅著曰屈指怒數

將謀盡殺之苞蓄未及泄丁重疾旬日而卒

羅隱

唐才子傳  
隱字昭諫

餘杭人詩名于天下尤長于詠史然多

所譏諷以故不中第大為唐宰相鄭畋李蔚所知隱雖  
負文稱然貌古而陋畋女幼有文性嘗覽隱詩卷諷誦  
不已畋疑其女有慕才之意一日隱至第鄭女垂簾而  
窺之自是絕不詠其詩唐廣明中因亂歸鄉里節度使  
錢鏐辟為從事開平初太祖以右諫議大夫徵不至魏  
博節度使羅紹威密表推薦乃授給事中年八十餘卒

于錢塘

澗泉日記云唐光啟三年吳越王表薦為錢塘令遷著作郎辟掌書記天祐三年充判官梁開

平二年授給事中三年遷發運使是年卒葬于定山鄉全部郎中沈崧銘其墓有文集數卷行

于世

唐才子傳云隱所著譏書譏本淮海寓言湘南應用集甲乙集外集啟事等並行於世五代史補

羅隱在科場恃才傲物尤為公輕所惡故六舉不第時長安有羅尊師者深于相術隱以貌陋恐為相術所棄每與尊師接談常自大以沮之及其累遭黜落不得已始往問焉尊師笑曰貧道知之久矣但以吾子決在一第未可與語今日之事貧道敢有所隱乎且吾子之于第一第也貧道觀之雖首冠羣英亦不過薄尉爾若能罷舉東歸霸國以求用則必富且貴矣兩途五子宜自擇之隱憤然不知所措者數日隣居有賣飯媪見隱驚曰何辭色之沮喪如此莫有不決之事否隱謂知之因盡以尊師之言告之媪歎曰秀才何事迷甚焉且天下皆



知羅隱何須一第然後為得哉不如急取富貴則老婆之願也隱聞之釋然遂歸錢塘時錢鏐方得兩浙置之幕府使典軍中書檄其後官給事中初隱罷上中書之日費寔因抵魏謁鄴王羅紹威將入其境先貽書叙其家世鄴王為姪幕府僚吏見其書皆怒曰羅隱一布衣耳而姪視大王其可乎紹威素重士且曰羅隱名振天下王公大夫多為所薄今惠然肯顧其何以勝得在姪行為幸多矣敢不致恭諸公慎勿言于是擁旆郊迎一見即拜隱亦不讓及將行紹威贈以百萬他物稱是仍致書于鏐謂叔父鏐首用之

仇殷不知何郡人也開平中仕至欽天監明于象緯歷數藝術精密近無其比光化中太祖在滑遣密王友倫以兵三萬禦幽州之師十餘萬深慮其不敵召殷問曰

陣可行乎曰其十四日過禺中乎又問之曰賊敗塗地  
又曰既望當見捷書果如其言不失晷刻太祖之在長  
蘆諸將請攻壁號令軍中人負藁二圍置千積俄而雲  
集殷曰何用或以所謀告之殷曰我占矣不見攻壁象  
無乃自退乎翼日有馳騎報丁會以潞州叛太祖令盡  
焚其藁而還不克攻聞平中殷一日朝罷過崇政院使  
敬翔直閣翔問之曰月犯房次星其逼若綴是何祥也  
曰常度耳殷欲不言既過數步自度不可默乃反言曰

三兩日當有不順語至無或驟恐宜先白上知既二日陝府奏同州劉知俊閉關作叛初王景仁之出師也殷上言太陰虧不利深入太祖遽遣使止之已敗于柏鄉矣殷所見觸類如是不可備錄然而畏慎特甚居常寢默未嘗敢顯言縱言事跡惟其語音不可盡曉以故屢貽責罰後卒于官

段深不知何許人開平中以善醫待詔于翰林時太祖抱疾久之其洩甚濁僧曉微待藥有微賜紫衣師號錫

賚甚厚頃之疾發曉微剥服色去師號因召深問曰疾  
愈復作草藥不足恃也我左右粒石而効者衆矣服之  
如何深對曰臣嘗奉詔診切陛下積憂勤失調護脉代  
乳而心益虛臣以為宜先治心心和平而澹變清當進  
飲劑而不當粒石也臣謹按太倉公傳曰中熱不澹者  
不可服石石性精悍有大毒凡餌毒藥如甲兵不得已  
而用之非有危殆不可服也太祖善之令進飲劑疾稍  
愈乃以幣帛賜之



舊五代史卷二十四

舊五代史卷二十四攷證

梁書列傳十四李珽傳河南有外黃小黃 小黃歐陽  
史作下黃攷困學紀聞云五代通錄李珽曰河南有  
外黃小黃漢地理志陳留有小黃下黃縣五代史記  
改小黃為下黃誤也當從通錄

秦有外黃都尉 都尉原本作郡尉今據漢書地理志  
及歐陽史改正

充侍講學士 案歐陽史作侍講

盧曾傳始為齊州防禦使朱瓊從事 案新唐書通鑑

與是書梁記皆稱朱瓊為齊州刺史惟此傳作防禦  
使疑有外誤

孫隲傳並格殺于前墀 案通鑑攷異引梁實錄作賜  
死通鑑作撲殺于前墀

杜荀鶴傳旬日而卒 案唐才子傳荀鶴以天祐元年  
卒北夢瑣言作梁受禪後拜翰林學士五日而卒未  
知孰是



羅隱傳羅隱餘杭人 案澗泉日記作新城人

因亂歸鄉里節度使錢鏐辟為從事 案唐新纂羅隱

初為吳令後以羅紹威薦為錢鏐所辟據是書則隱

自歸里即為鏐從事後復為紹威薦也與新纂異

仇殷傳殷上言太陰虧不利深入太祖遽遣使止之已

敗于柏鄉矣 案北夢瑣言云柏鄉狼狽梁祖亦自

咎曰違犯天道不取仇殷之言也此云太祖遽遣使

止之與北夢瑣言異

舊五代史卷二十四攷證

欽定四庫全書

舊五代史卷二十五

宋門下侍郎叅知政事監修國史薛居正等撰

唐書第一

武皇紀上

太祖武皇帝諱克用本姓朱耶氏其先隴右金城人也  
始祖拔野唐貞觀中為墨離軍事從太宗討高麗薛延  
陀有功為金方道副都護因家於瓜州太宗平薛延陀

諸部於安西北庭置都護屬之分同羅僕骨之人置沙  
陀都督府蓋北庭有磧曰沙陀故固以為名焉永徽中  
以拔野為都督其後子孫五世相承曾祖盡忠貞元中  
繼為沙陀府都督既而為吐蕃所陷乃舉其族七千帳  
徙於甘州盡忠尋率部眾三萬東奔俄而吐蕃追兵大  
至盡忠戰歿祖執宜即盡忠之長子也收合餘眾至於  
靈州德宗命為陰山府都督元和初入為金吾將軍遷  
蔚州刺史代北行營招撫使

新唐書沙陀傳元和三年  
盡忠歿靈州塞詔處其部

鹽州置陰山府以執宜為府兵馬使朝長安授特進金吾衛將軍從攻鎮州進蔚州刺史破吳元濟授檢校刑部尚書長慶初破賊深州入朝留宿衛拜金吾衛將軍太和中授陰山府都督代北行營招撫使莊宗

即位追謚為昭烈皇帝廟號懿祖烈考國昌本名赤心

唐朔州刺史咸通中討龐勛有功入為金吾上將軍賜

姓李氏名國昌

代州有唐故龍武軍統軍檢校司徒贈太保龍西李公神道碑云公諱國昌字

德興仍係鄭王房出為振武節度使尋為吐渾所襲退保於神武川及武皇鎮太原表為代北軍節度使中和三年薨莊宗即位追謚為文皇廟號獻祖武皇即獻祖之

第三子也母秦氏以大中十年丙子歲九月二十二日生於神武川之新城在姪十三月載誕之際母艱危者竟夕族人憂駭市藥於鴈門遇神叟告曰非巫醫所及可馳歸盡率部人披甲持旄擊鉦鼓躍馬大噪環所居三周而止族人如其教果無恙而生是時虹光燭室白氣充庭井水暴溢武皇始言喜軍中語齟齬善騎射與儕類馳騁嬉戲必出其右年十三見雙鳬翔於空射之連中衆皆臣伏新城北有毗沙天王祠祠前井一日沸

蓋武皇因持卮酒而奠曰予有尊主濟民之志無何并  
蓋故未察其禍福惟天王若有神竒可與僕交談奠酒  
未已有神人被金甲持戈隱然出於壁間見者大驚走  
惟武皇從容而退繇是蓋自負獻祖之討龐勛也武皇  
年十五從征摧鋒陷陣出諸將之右軍中目為飛虎子  
賊平獻祖授振武節度使武皇為雲中牙將嘗在雲中  
宿於別館擁妓醉寢有俠兒持刃欲害武皇及突入曲  
室但見烈火熾赫於帳中俠兒駭異而退又嘗與達靼

部人角勝達靺指雙鵬於空曰公能一發中否武皇即  
彎弧發矢連貫雙鵬邊人拜伏及壯為雲中守促使事  
防禦使支謨與同列晨集廨舍因戲升郡閣踞謨之座  
謨亦不敢詰乾符三年朝廷以段文楚為代北水陸發  
運雲州防禦使時歲薦饑文楚稍削軍食諸軍咸怨武  
皇為雲中防邊督將部下爭訴以軍食不充邊校程懷  
素王行審蓋寓李存璋薛鐵山康君立等即擁武皇入  
雲州衆且萬人營於鬪鷄臺城中械文楚出以應於外



諸將列狀以聞請授武皇旄鉞朝廷不允徵諸道兵以討之乾符五年黃巢渡江其勢滋蔓天子乃悟其事以武皇為大同軍節度使檢校工部尚書冬獻祖出師討党項吐渾赫連鐸乘虛陷振武舉族為吐渾所擄武皇至定邊軍迎獻祖歸雲州雲州守將拒關不納武皇略蔚朔之地得三千人屯神武川之新城赫連鐸晝夜攻圍武皇昆弟三人四面應賊俄而獻祖自蔚州引軍至吐渾退走自是軍勢復振天子以赫連鐸為大同軍節

度使仍命進軍以討武皇乾符六年春朝廷以昭義節度使李鈞充北面招討使將太原之師過石嶺關屯於代州與幽州李可舉會赫連鐸同攻蔚州獻祖以一軍禦之武皇以一軍南抵遮虜城以拒李鈞是冬大雪弓弩弦折南軍若寒臨戰大敗奔歸代州李鈞中流矢而卒廣明元年春天子復命元師李涿率兵數萬屯代州武皇令軍使傅文達起兵於蔚州朔州刺史高文集與薛葛安慶等部將縛文達送於李涿六月李涿引大軍

攻蔚州獻祖戰不利乃率其族奔於達旦部居數月吐  
渾赫連鐸密遣人賂達旦以離間獻祖既而漸生猜阻  
武皇知之每名其豪右射獵於野或與之百步馳射馬  
鞭或以懸針樹葉為的中之如神由是部人心伏不敢  
竊發俄而黃巢自江淮北渡武皇椎牛醢酒饗其酋首  
酒酣喻之曰予父子為賊臣讒間報國無由今聞黃巢  
北犯江淮必為中原之患一日天子赦宥有詔徵兵僕  
與公等向南而定天下是子心也人生世間光景幾何

曷能終老沙堆中哉公等勉之達旦知無留意皆釋然  
無間是歲十一月黃巢寇潼關天子令河東監軍陳景  
思為代北起軍使收兵破賊十二月黃巢犯長安僖宗  
幸蜀陳景思與李友金發沙陀諸部五千騎南赴京師  
友金即武皇之族父也

通鑑友金初與高文集註降於  
李琢故得與陳景思南赴京師

中和元年二月友金軍至絳州將渡河刺史史瞿鎮謂陳  
景思曰巢賊方盛不如且還代北徐圖利害四月友金  
旋軍鴈門瞿鎮至代州半月之間募兵三萬營於崞縣

之西其軍皆北邊五部之衆不開軍法瞿稹李友金不能制友金謂景思曰興大衆成大事當威名素著則可以伏人今軍雖數萬苟無善帥進亦無功吾兄李司徒父子去歲獲罪於國家今寄北部雄武之略為衆所推若驃騎急奏召還代北之人一麾響應則妖賊不足平也景思然之促奏行在天子乃以武皇為鴈門節度使

仍令以本軍討賊

新唐書王重榮傳重榮懼黃巢復振憂之與楊復光計復光曰我世與李

克用共憂患其人忠不顧難死義如己若乞師馬事茂不濟乃遣使者約運和

李友金發五百

騎齋詔召武皇於達靼武皇即率達靼諸部萬人趨鴈門五月整兵二萬南嚮京師太原鄭從讜以兵守石嶺關武皇乃引軍出他道至太原城下會大雨班師於鴈門中和二年八月獻祖自達靼部率其族歸代州十月武皇率忻代蔚朔達靼之軍三萬五千騎赴難於京師先移檄太原鄭從讜拒關不納武皇以兵擊之進軍至城下遣人齎幣馬遺從讜從讜亦遣人饋武皇餽幣饗餽軍器武皇南去自陰地趨晉絳十二月武皇至河中

中和三年正月晉國公王鐸承制授武皇東北面行營都統武皇令其弟克修領前鋒五百騎渡河視賊黃巢遣將米重威齎重賂及偽詔以賜武皇武皇納其賂以給諸將燔其偽詔是時諸道勤王之師雲集京畿然以賊勢尚熾未敢爭鋒及武皇將至賊帥相謂曰鴉兒軍至當避其鋒武皇以兵自夏陽濟河二月營於乾坑店黃巢大將尚讓林言王璠趙璋等引軍十五萬屯於梁田坡翼日大軍合戰自午及晡巢賊大敗是夜賊衆遁

據華州武皇進軍圍之巢弟黃鄴黃揆固守三月尚讓  
引大軍赴援武皇率兵萬餘逆戰於零口巢軍大敗武  
皇進軍渭橋翼日黃揆棄華州而遁王鐸承制授武皇  
鴈門節度使檢校尚書左儀射四月黃巢燔長安收其  
餘衆東走藍關武皇進收京師七月天子授武皇金紫

光祿大夫檢校左僕射河東節度使

舊唐書傳宗紀五  
月制以鴈門以北

行營節度使代州刺史上柱國食邑七百戶李克用檢校尚書左  
僕射代州刺史上柱國食邑七百戶李克用檢校尚書左  
同平章事兼太原尹北京留守充河東節度管内觀察  
處置等使新唐書沙陀傳云收京師功第一進同中書



門下平章事  
幾以克川領河東節度  
西郡公未

是時武皇既收長安軍勢甚

雄諸侯之師皆畏之武皇一目微眇故其時號為獨眼  
龍是月武皇仗節赴鎮遣使報鄭從讜請治裝歸朝武  
皇次於郊外因往赴鴈門寧覲獻祖八月自鴈門赴鎮  
河東時年二十有八十一月平潞州表其弟克修為昭  
義節度使潞帥孟方立退保於邢州十二月許帥田從  
異汴帥朱溫徐帥時溥陳州刺史趙犂各遣使來告以  
巢蔡合從凶鋒尚熾請武皇共力討賊中和四年春武

皇率蕃漢之師五萬自澤潞將下天井關河陽節度使  
諸葛爽辭以河橋不完仍屯兵於萬善數日移軍自河  
中南渡趨汝洛四月武皇合徐汴之師破尚讓於太原  
斬獲萬計進攻賊於西華賊將黃鄴棄營而遁是夜大  
雨巢營中驚亂乃棄西華之壘退營陳州北故陽里五  
月癸亥大雨震電平地水深數尺賊營為水所漂而潰  
戊辰武皇引軍營於中牟大破賊於王滿渡庚午巢賊  
大至濟汴而北是夜復大雨賊黨驚潰武皇營於鄭州

賊衆分寇汴境武皇渡汴遇賊將渡而南半濟擊之大  
敗之臨陣斬賊將李周王濟安陽景彪等是夜賊大敗  
殘衆保於胙縣冤句大軍躡之黃巢乃携妻子兄弟千  
餘人東走武皇追賊至於巢州是月班師過汴汴帥迎  
勞於封禪寺請武皇休於府第乃以從官三百人及監  
軍使陳景思館於上源驛是夜張樂陳宴席汴帥自佐  
饗出珍幣侑勸武皇酒酣戲諸侍妓與汴帥握手叙破  
賊事以為樂汴帥素忌武皇乃與其將楊彦洪密謀竊

發彥洪於巷陌連車樹柵以拒奔竄之路時武皇之從  
官皆醉俄而伏兵竊發來攻傳舍武皇方大醉譟聲動  
地從官十餘人捍賊侍人郭景銖滅燭扶武皇以茵幕  
裹之匿於牀下以水洒面徐曰汴帥謀害司空武皇方  
張目而起引弓抗賊有頃煙火四合復大雨震電武皇  
得從者薛鐵山賀回鶻等數人而去雨水如澍不辨人  
物隨電光登尉氏門縋城而出得還本營監軍陳景思  
大將史敬思竝遇害武皇既還營與劉夫人相向慟哭

詰旦欲勒軍攻汴夫人曰司空比為國家討賊赴東諸  
侯之急雖汴人謀害自有朝廷論列若反戈攻城則曲  
在我也人得以為辭乃收軍而去馳檄於汴帥汴帥報  
曰竊發之夜非僕本心是朝廷遣天使與牙將楊彥洪  
同謀也武皇自虎牢關西趨蒲陝而旋秋七月至太原  
武皇自以累立大功為汴帥怨圖陷沒諸將乃上章申  
理及武皇表至朝廷大恐遣內臣宣諭尋加守太傅同  
平章事隴西郡王光啟元年三月幽州李可舉鎮州王

景崇連兵寇定州節度使王處存求援於武皇武皇遣大將康君立安老薛可郭啜率兵赴之五月鎮人攻無極武皇親領兵救之鎮人退保新城武皇攻之斬首萬餘級獲馬千匹王處存亦敗燕軍於易州十一月河中王重榮遣使來乞師且言邠州朱玫鳳翔李符將加兵於已初武皇與汴人構怨前後八表請削奪汴帥官爵自以本軍進討天子累遣內臣楊復恭宣旨令且全大體武皇不時奉詔天子頗右汴帥時觀軍容使田令孜

君側擅權惡王重榮與武皇膠固將離其勢乃移重榮於定州重榮告於武皇武皇上章言李符朱玫挾邪忌正黨庇朱溫臣已點檢蕃漢軍五萬取來年渡河先斬朱玫李符然後平溫朱溫

新唐書王重榮傳詔克用將兵援河中重榮貽克用書且

言奉密詔須公到使我國公此令致朱全忠朱玫之惑上也因示偽詔克用方與全忠有隙信之請討全忠反

攻天子覽表遣使譬喻百端輒傳相望既而朱玫引邠鳳之師攻河中王重榮出師拒戰朱玫軍於沙苑對壘月餘十二月武皇引軍渡河與朱玫決戰玫大敗收軍

夜遁入於京師時京城大駭天子幸鳳翔武皇退軍於河中光啟二年正月僖宗駐蹕於寶雞武皇自河中遣使上章請車駕還京且言大軍止誅凶黨時田令孜請僖宗南幸興元武皇遂班師朱玫於鳳翔立嗣襄王煬為帝以偽詔賜武皇武皇燔之械其使馳檄諸方鎮遣來使奉表於行在九月武皇遣昭義節度使李克修討孟方立於邢州大敗方立之衆於焦崗斬首數千級以大將安金俊為邢州刺史以撫其降人十月進攻邢州



邢人出戰又敗之孟方立求據於鎮州鎮人出兵三萬以援方立克修班師光啟三年六月河中節度使王重榮為部將常行儒所殺武皇表重榮兄重盈為帥七月武皇以安金俊為澤州刺史時張全義自河陽據澤州及李罕之收復河陽召全義令守洛陽全義乃棄澤州而去故以金俊守之文德元年二月僖宗自興元還京三月僖宗崩昭宗即位以武皇為開府儀同三司檢校太師兼侍中隴西郡王食邑七千戶食實封二百戶河

南尹張全義潛兵夜襲李罕之於河陽城陷舉族為全義所擄罕之踰垣獲免遂來歸於武皇遣李存孝薛阿檀史儼兒安金俊安休休將七千騎送罕之至河陽汴將丁會牛存節葛從周將兵赴援李存孝率精騎逆戰於溫縣汴人既扼太行之路存孝殿軍而退騎將安休休以戰不利奔於蔡武皇以罕之為澤州刺史選領河陽節度使十月邢州孟方立遣大將奚忠信將兵三萬寇遼州武皇大破之斬首萬級生擒奚忠信龍紀元年

五月遣李罕之李存孝攻邢州六月下磁州邢將馬漑率兵數萬來拒戰罕之敗之於琉璃陂生擒馬漑徇於城下孟方立恚恨飲酖而死三軍立其姪遷為留後使求援於汴汴將王虔裕率精甲數百入於邢州罕之等班師大順元年遣李存孝攻邢州孟遷以邢洺磁三州降執汴將王虔裕三百人以獻武皇徙孟遷於太原以安金俊為邢洺團練使三月昭義軍節度使李克修卒以李克恭為潞州節度使是月武皇攻雲州拔其東城

赫連鐸求援於燕燕帥李匡威將兵三萬以赴之戰於城下燕軍大敗時徐州時溥為汴軍所攻遣使來求援武皇命石君和由兗鄆以赴之五月潞州軍亂殺節度使李克恭州人推牙將安居受為留後南結汴將時潞之小將馮霸擁叛徒三千騎駐於沁水居受使人召之馮霸不至居受懼出奔至長子為村胥所殺傳首於霸霸遂入潞州自為留後武皇遣大將康君立李存孝等攻之汴將朱崇節葛從周等兵入潞州以固之是時幽

州李匡威雲州赫連鐸與汴帥協謀連上表請加兵於  
太原宰相張濬孔緯贊成其事六月天子削奪武皇官  
爵以張濬為招討使以京兆尹孫揆為副華州韓建為  
行營都虞候以汴帥為河東南面招討使幽州李匡威  
為河東北面招討使雲州赫連鐸為副汴將朱友裕將  
兵屯晉絳時汴軍已據潞州又遣大將李讜等率軍數  
萬急攻澤州武皇遣李存孝自潞州將三千騎以援之  
汴將鄧季筠以一軍犯陣存孝追擊擒其都將十數人

獲馬千騎匹是夜李讜收軍而退大軍掩擊至馬牢關斬首萬餘級追襲至懷州而還存孝復引軍攻潞州八月存孝擒新授昭義節度使孫揆初朝廷授揆節鉞以本軍取刀黃嶺路赴任存孝偵知之引騎三百伏於長子縣崖谷間揆建牙持節褒衣大蓋擁衆而行存孝械揆等口遂擒揆及中使韓歸範并將校五百人存孝械揆等以組練繫之環於潞州遂獻於武皇武皇謂揆曰公縉紳之士安信徐步可至達官何用如是揆無以對

今繫於晉陽獄武皇將用為副使使人誘之揆言不遜  
遂殺之九月汴將葛從周棄潞州而遁武皇以康君立  
為潞州節度使以李存孝為汾州刺史十月張濬之師  
入晉州遊軍至汾隰武皇遣薛鐵山李承嗣將騎三千  
出陰地關營於洪洞遣李存孝將兵五千營於趙城華  
州韓建以壯士三百人冒犯存孝之營存孝追擊直壓  
晉州西門張濬之師出戰為存孝所敗自是閉壁不出  
存孝引軍攻絳州十二月晉州刺史張行恭棄城而奔

韓退張濬由舍山路遁去大順二年春正月武皇上章  
申理其略曰臣今身無官爵名是罪人不敢歸陛下藩  
方且欲於何中寄寓進退行止伏候聖裁天子尋就加

守中書令

歐陽史二月復拜克用河東節度使  
隴西郡王加檢校太師無中書令

是月魏

博為汴將葛從周所寇節度使羅弘信遣使來求援武  
皇出師以赴之三月邢州節度使安知建叛奔青州天  
子以知建為神武統軍自棣州沂河歸朝鄆州朱瑄邀  
斬於河上傳首晉陽以李存孝為邢州節度使四月武



皇大舉兵討赫連鐸於雲州遣騎將薛阿檀率前軍以  
進攻武皇設伏兵於御河之上大破之因塹守其城七  
月武皇進兵柳會赫連鐸力屈食盡奔於吐渾部遂歸  
幽州雲州平武皇表石善友為大同軍防禦使邢州節  
度使李存孝以鎮州王鎔託附汴人謀亂河朔北連燕  
寇請乘雲代之捷平定燕趙武皇然之八月大蒐於晉  
陽遂南巡澤潞略地懷孟河陽趙克裕望風送款請修  
隣好九月蒐於邢州十月李存孝董前軍攻臨城鎮人

五萬營於臨城西北龍尾崗武皇令李存審李存賢以步軍攻之鎮人大敗殺獲萬計拔臨城進攻元氏幽州李匡威以步騎五萬營於鄆邑以援鎮州武皇分兵大掠旋軍邢州

舊五代史卷二十五

舊五代史卷二十五攷證

唐武皇紀上中和三年薨 案新唐沙陀傳作光昌三年國昌卒與是書異

以武皇為大同軍節度使 案歐陽史作拜克用為大同防禦使新唐書作以國昌為大同軍防禦使通鑑作以國昌為大同節度使俱與是書異

天子復命元帥李琢 案歐陽史作招討使李琢通鑑亦作琢俱與是書異

與薛葛安慶等部將 案新唐書作薩葛首領米海萬

安慶

天子乃以武皇為鴈門節度使 案新唐書表中和二年以河東忻代二州隸鴈門節度更大同節度為鴈門節度治代州是中和二年以前雁門非鎮名也據舊唐書初赦克用拜代州刺史忻代兵馬留後二年擢雁門節度神策天寧軍鎮遏忻代觀察使是克用為雁門節度實在位二年是書作元年疑誤

十一月平潞州表其弟克修為昭義節度使 案通鑑  
克用表克修為昭義軍節度使在四年八月與是書  
異

汴帥素忌武皇 案梁紀作李克用乘醉任氣帝不平  
之攷新唐書沙陀傳亦作全忠忌克用桀邁難制與  
此紀合蓋全忠攻上源驛實忌其威名而欲害之非  
徒以其乘醉任氣也

鎮州王景崇 王景崇舊唐書作王鎔攷藩鎮傳景崇

以中和二年卒子鎔繼立是光啟初寇定州者當為  
王鎔也通鑑從舊唐書

光啟元年三月節度使王處存求援於武皇武皇遣大  
將康君立安老薛可郭嘏率兵赴之五月鎮人攻無  
極武皇親領兵救之案曲陽天安廟李克用題名

碑云李克用以幽鎮侵擾中山領蕃漢步騎五十萬  
親來救援時中和五年二月二十一日也至三月十  
七日以幽州請就和斷遂卻班師攻舊唐書中和五

年三月丙辰朔丁卯駕至京師己巳御宣政殿大赦  
改元是三月之十四日己改光啟曲陽去京師遠故  
未知耳又克用親援處存與通鑑遣將唐君立異今  
攷是書武皇先遣康君立等與通鑑合繼乃親領兵  
救之與題名碑合惟是書作五月碑作三月微有互  
異耳

乃移重榮於定州 案歐陽史作徙重榮於兗州攷新  
唐書王重榮傳亦云令攷徙重榮兗海節度使與是

書異

武皇上章言李符朱玫挾邪忌正 李符歐陽史作李

昌符蓋唐實錄避獻祖諱故去昌字

孟方立恚恨飲酖而死三軍立其姪遷為留後 案舊

唐書昭宗紀歐陽史莊宗紀皆以孟遷為方立之弟

新唐書孟方立傳作方立之從弟此紀又作方立之

姪未詳孰是

六月天子削奪武皇官爵 六月新唐書作五月



以張濬為招討使 案新唐書本紀作張濬為行營都  
招討宣慰使張濬傳作河東行營兵馬招討制置使  
歐陽史作太原四面行營兵馬都統

華州韓建為行營都虞候 案歐陽史作韓建為副使  
新唐書張濬傳作韓建為供軍使

八月存孝擒新授昭義節度使孫揆 案新唐書作七  
月戊申李克用執昭義節度使孫揆通鑑從是書作

八月

張濬之師出戰為存孝所敗 案新唐書帝紀作十一月張濬及李克用戰於陰地敗績歐陽史亦作十一月與是書先後互異

舊五代史卷二十五 攷證